

ASO LULU, 18 FEPUARI 2015

Na nofoia le Nofoa e le Fofoga Fetalai i le itula e 9.00 i le taeao.

Tatalo.

FOFOGA FETALAI: E le faaititia le agaga o le faafetai i le Atua. Ua manatu e le lilo e le lanu i a tatou upu ma tala i le tatou faasani ma le tatou faapolo sa siitia i lenei taeao fou, ae tau ia o se mea e iloga ai lo tatou faamanu i le Alii ona ua mafai ona tatou aulia lenei aso. Faafetai ua vaai atu sulu o le tino ua atoa tagi le paia ma le mamalu maualuga o le tatou Maota i sui usufono mamalu, lau Afioga i le Taitai o le Malo ma lau Kapeneta, lau Afioga i le Taitai o le Itu Agai ma sui usufono mamalu uma o le Maota Fono.

E faafeiloai atu foi i le paia ma le mamalu o lo tatou atunuu i Faaululuga o Matagaluega ma Faalapotopotoga, Afioga i le Loia Sili aemaise itutino o le Malo ua tatou potopoto faatasi i lenei aso ona o le faaauauina o a tatou galuega. Ua malo le soifua manuia, malo le onosai, malo foi le folau. Ua faafetai le onosai mai i le tatou Fonotaga. E manatu o lea ua faataatia le alafua; o le aso ananafi ua maea ona tuuina atu le tala ootoo ma le tala atoa mo le faaauauina o a tatou galuega mo lenei masina. O le faamoemoe ia lava mai pea le onosai ma lavapapale le tatou Maota aua e talitonu o le a tulituli ma faaauau a tatou galuega e pei ona fuafuaina. E faapai atu foi i le tapuaiga a lo tatou atunuu i lenei taeao. Ua malo le soifua manuia Samoa; o le agaga ma le faamoemoe ia alo mai i outou faiva tapuai. E talitonu e man faiva o lau Palemene ona o lau tatalo ma lau tapuaiga mau.

TUUNA ATU O PEPA

Na tolaulauina e le Failautusi le Pepa ua faataatia i luga o le Laulau a Fono e tusa ai ma le T.T.48.

1. P.P.2014/2015 Nu.205, Lipoti Faaletausaga a le Falemeli o Samoa mo le Tausaga 2013/2014.

TUUNA ATU O LIPOTI A KOMITI FILIFILIA

Na tolaulauina e le Failautusi le Lipoti a le Komiti Filifilia ua faataatia i luga o le Laulau a Fono e tusa ai ma T.T.51(5).

1. P.P.2014/2015 Nu.206, Lipoti a le Komiti o Mataupu tau Faamasinoga, Leoleo & Falepuipui ma Faamasinoga o Fanua ma Suafa i le P.P.2014/2015 Nu.38, Lipoti a le Komisi o le Toefuataiga o Tulafono a Samoa i le Tulafono Faatonutonu a le Au Faasalalau, Lipoti 10/12.

18 FEPUARI 2015

**TULAFONO TAU FAAOFI O TULAGA TAGATANUU I LE
TEUFAAFAIGALUEGAINA O TUPE MAI FAFO 2014
– faaauau felafolafoaiga i luga o le faitauga faalua**

FOFOGA FETALAI: E tolopo Galuega a le Maota i le Aso Fono ananafi o lo o saunoa faamalamalama le Afioga i le Minisita i le Tulafono Tau Faaofi, Afioga i le Sui Palemia. O lea ou te valaau atu ai i lau Afioga i le Sui Palemia e te tulai mai i lenei taeao e faaauau lau folasaga e ala i le faamalamalamaina o le faitauga faalua o lenei Tulafono Tau Faaofi taua ua i luma o le Maota.

Tulai mai lau Afioga i le Sui Palemia.

Tofa Hon FONOTOE NUAFESILI PIERRE LAUOFO (Sui Palemia, Minisita mo Pisinisi, Alamanuia ma Leipa): Faafetai i lau Afioga i le Fofoga Fetalai mo le avanoa. Ua tatou auai faatasi i le taulaga ua osia e lau Afioga i le Fofoga Fetalai i lenei taeao aua lo tatou va ma lo tatou Tama Sili i le lagi.

O lenei taeao ua ou tulai atu e ofo alofa ma faatalofa atu i lo tatou Maota ae faapea foi le tapuaiga a Samoa o lo o faafogafoga mai, ma faaauauina foi se upu a lo tatou Malo e faamalamalama ai le Tulafono Tau Faaofi e pei ona opea nei i le Maota.

E malolo le Fonotaga i le aso ananafi ua ou oo mai i tulaga i agavaa o kamupani po o tagata e talosaga mo le avanoa i lalo o le polokalame lenei, po o pemitā nofomau mo le tolu tausaga ma faagasolo ai a latou atinae. Ae ou te le i oo atu la i le tulaga lena lau Afioga i le Fofoga Fetalai, ou te fia faamalamalama le tulaga lea i sitiseni Samoa ona o lea ou te matauina i faasalalaua le tulaga lea e pei e foliga mai na o le tasi lava le sitiseni Samoa, na o tagata e soifua i Samoa.

Mo le silafia e fa ituaiga sitiseni Samoa pe fa auala e maua ai sitiseni Samoa.

1. O le sitiseni lea o le tagata na soifua ae i Samoa pe na fanau i Samoa lea e taua o le citizenship by birth.
2. O le sitiseni lea e maua mai i le tama po o le tina na fanau i Samoa pe a faapea o oe lea sa e soifua i fafo. E le o oe o se sitiseni Samoa, ae e te agavaa la i le sitiseni Samoa pe afai e sitiseni lou tama po o lou tina na soifua ae i Samoa.
3. O le sitiseni lea e maua pe a e faaipoipo atu i se alii po o se tamaitai Samoa po o le sitiseni lea by marriage. O sitiseni foi ia o la e maua i isi atunuu.
4. O le sitiseni lea e maua pe a maea ona e nofomau i Samoa mo le lima tausaga pe a faapea o le tulaga lea sa e nofomau i se pemitā nofomau i Samoa e lima tausaga. A maea ona e agavaa lea e te talosaga mo se sitiseni;
5. ma le sitiseni lea e taumafai atu i lalo o le polokalame lenei.

O lona uiga e lima ai ituaiga sitiseni e mafai ona maua i lo tatou atunuu. E maua i lalo o le polokalame lenei pe a maea le tolu tausaga o lou pemitā nofomau pe a e agavaa.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

E pei o lena ua uma ona ou faamatala atu i le aso ananafi, e le faapea e te sau na ona talosaga lava maua loa. E leai, e i ai le Komiti e ave i ai lau talosaga ma iloilo ona faatoa fai ai lea o se faaiuga. O agavaa la e tataua ona i ai se vaegatupe. O lea la e aumai i le tatou polokalame e \$4miliona le tupe maualalo e amata ai le tulaga i le atinae pe a faapea ua e agavaa mo le pemita e tolu masina e te nofomau ai i Samoa, pe a faapea o lena e i ai lou naunautaiga e faafaigaluega au tupe i Samoa nei. E fai au pisinisi i lalo o pisinisi ia ua agavaa lea e pei ona ou taua o qualifying investment. O lea la sa ou taua e pei o se faataitaiga, o pisinisi tau turisi. E mafai ona sili atu i le \$4miliona aua e leai se tapulaa i le alu i luga.

O lea ou te tau manatua aua e i ai le fale talimalo lea e pei ona silafia, lea o lo o fau nei i Taumeasina. Ou te tau manatua e pei lava e i ai le latou tupe faavae lea na amata ai pe \$85miliona ea pe (AUS)\$75miliona. Ou te le o manatua lelei pe sao au, ae masalo o lea e silafia e le Afioga i le Palemia le tulaga lea. O lona uiga a faaliliu i tupe Samoa, ua ova atu i le \$100miliona. Ona tatou tilotilo lea i ituaiaga poloketi faapea po o pisinisi ia i le tulaga i galuega e maua mai ai ma tulaga uma faapena.

E \$4miliona e amata ai po o se tupe lena e amata ai ma o le maualalo lena i le tulaga i le tupe faavae. E sao foi le saunoaga a se tasi o sui usufono i le aso ananafi, susuga i le faifeau Faipule, ioe. Atonu e sao lelei le saunoaga e maua fua sitiseni i le lagi. E le sese, ae e faamanatu atu i le susuga i le faifeau, e maua fua foi sitiseni i Seoli e le faatauina. Ona pau lava le mea e tilotilo i ai o le amio po o lelei le amio a le tagata, ona iloa lea po o se sitiseni o le lagi po o se sitiseni o Seoli; e faapena. A o le tulaga lena tatou te tilotilo foi i amioga a tagata e pei o talaiga sese e taulegaina ai le atunuu ma uiga foi iaí í

Afioga Hon Palusalua Faapo II (Taitai o le Itu Agai): Lau Afioga i le Fofoga Fetalai o le mea e fia faasao.

FOFOGA FETALAI: Ou te manatu o le a avatu lava le avanoa pe a oo i le taimi o felafolafoaiga.

Afioga Hon Palusalua Faapo II: Ia manatua foi saunoaga a le Afioga i le Palemia, ia faasao i le taimi lena e piʻo ai le uamea meamanu o vevela, leaga e fai sina maaleale o le mea lea ua saunoa i ai le Sui Palemia.

FOFOGA FETALAI: E talafeagai la i a tatou faiga faavae i le taimi e talafeagai ai. A o le taimi lena, se i fofola mai mataupu ae faamaumau lelei aua e le mamao se va. A oo foi i le taimi lena, ona ou tuu atu lava lea o le avanoa e tali ai i le mea lea e saunoa i ai le Sui Palemia.

Afioga Hon Palusalua Faapo II: O le a ou usitai, o au na o le usitai lava le mea lea ua i ai.

18 FEPUARI 2015

Tulafono Tau Faaofi o Tulaga Tagatanuu i le Teufaafalaluegaina o Tupe Mai Fafu 2014 – felafolafoaiga i luga o le faitauga faalua

FOFOGA FETALAI: Ia, se i tulai mai lau Susuga i le Faafeagaiga, se tasi o sui usufono mo Salega, Tofa Tapuai Toese Ah Sam.

Tofa Tapuai Toese Ah Sam (Salega): E le faaititia le viiga o le Atua i lenei taeao aua e leai lava se loto e fai pe ana momoe ma le toe feala mai, ae e pei ua fou mai le alofa o le Atua. Ia faafou lo tatou alofa i le Atua ma Samoa lea na aumaia tatou e faia a latou feau.

Ua ou tulai atu leaga e fai lava sina ogaoga o lau saunoaga lau Afioga i le Sui Palemia. Ou te le i fai atu ananafi e free le sitiseni i le lagi. E free ia tatou, a o le tagata ia i le Atua. Na maluu ai le Atua, it is costly i le Atua ae free mo tatou.

O le faasaoga lena lau Afioga i le Fofoga Fetalai.

Tofa Hon FONOTOE NUAFESILI PIERRE LAUOFO: Lau Afioga i le Fofoga Fetalai, o le mafuaaga tonu lava lea na ou afea ai le fasi fuaitau lea o le tatalo a le Afioga i le faifeau. Na ou manao e tulai se i lauga, se i saunoa ae se i faafofoga le Maota. Ua faafetai o lea ua faalogologo atu i le saunoaga a le sui usufono; ae leaga o lea na ia taua e faapea e le \$4miliona le tau o le sitiseni ananafi, ae ui i lea taatia ia lea vaega. O le mea e sili o lea ua tulai mai, o lea la ua ou faalogologo atu. Sa ou faapea e uma lenei Paeaiga ou te le faalogo i le sui usufono, ae faafetai.

O le a faaauau le faamalamalamaina o le Tulafono Tau Faaofi.

Tofa Lealailepule Rimoni Aiafi (Faleata Sisifo): Lau Afioga i le Fofoga Fetalai ..

FOFOGA FETALAI: E le i faia sau mau i se sitiseni i le aso ananafi. O lea saí í

Tofa Lealailepule Rimoni Aiafi: E leai o le fesoasoani i le Afioga i le Sui Palemia. Aua le oso fua i le mea e le oo i ai le malamalama. E matautia le Tusi Paia i le faifeau í

FOFOGA FETALAI: Malie Lealailepule, malie o lea e sagatonu le lauga a le Sui Palemia leaga o lea sa saunoa le Susuga i le Faafeagaiga ananafi. A oo i le taimi o felafolafoaiga i le mataupu, ona tuu atu lava lea. Ona tulai mai lava lea o le tagata ia e sauea mai i lona manatu aua e le masalosalo le saunoaga a le faifeau i le aso ananafi.

Ua outou faafofoga foi i le taimi ae ou te le i tuu atu le avanoa ia Tapuai, òAumai le feau.ö O le feau lea na aumai ananafi. Ia toa la le tai, o lea foi e sagatonu le finagalo o lea e tau laulau mai e le Sui Palemia ituaiga sitiseni eseese. A o lea foi tatou te ola ma le titania o lo o i ai foi, a o le filifiliga e fai e le tagata po o fea le sitiseni e fia alu i ai, po o le lagi po o Seoli. A o le faamanatu ia a le faifeau o lea ua taoto i lagotonu.

Tulai mai lau Afioga i le Sui Palemia.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

Tofa Hon FONOTOE NUFESILI PIERRE LAUOFO: Faafetai i lau Afioga i le Fofoga Fetalai. O lena tonu lava, e pei foi lea na o se faaatoaga lea na ou fai atu ai i sitiseni leaga o lea sa faasolo atu ituaiga sitiseni.

Lau Afioga i le Fofoga Fetalai, o le tulaga lea e pei o le faataitaiga lea na ou avatu i atinae e agavaa i lalo o le polokalame lena, lea e aumai ai o le tasi o ituaiga pisinisi o nofoaga mo tagata maimoa mai fafo po o turisi i se isi faaupuga. Afai la e sau se faipisinisi mai fafo agavaa i lea ituaiga pisinisi, silasila foi la i le manuia o le atunuu o le a maua mai ai? O le mea lea sa taumafai atu ai i le folasaga ananafi. O lona uiga o le a faatupulaia tagata tafafao maimoa mai ma o le a faatupulaia foi malaga a vaalele e omai i Samoa. O lona uiga o le a toatele tagata faigaluega ma tele avanoa faigaluega o le a maua, e le gata i le malae vaalele, o tagata galulue i vaalele faapea foi luga o le malae vaalele aemaise foi o tagata faigaluega a le Malo. Aua e tatau foi ona faaopoopo tagata faigaluega a le Malo o le a galulue i le malae vaalele i Ofisa e pei o le Tiute, o le Quarantine, o le Immigration ma o i latou uma na e manaomia ona faaopoopo.

O le a faatupulaia foi faiga malaga a vaalele pe afai e faatupulaia le tele o nofoaga nei po o fale talimalo ma tele tagata e tafafao maimoa mai. O ai la isi e manuia ai i nei fuafuaga? A omai turisi ma tele turisi e manuia ai le aufai-taxi. Aua e manuia le aufai-taxi pe a omai faaoga taavale lau pasese nei e feoai ai ma o e matamata ma tafafao i le atunuu, ae faapea foi le aufaiveni ma le aufaipasi. O ai isi e manuia ai? E manuia ai faleoloa, e manuia ai fale aiga. E tele la faamanuiga o le a maua i le polokalame lena pe a manuia ma solosolo lelei le faatinoga. A o le tualuga o na mea uma, e manuia ai ma siitia lelei le tamaoaiga o le atunuu.

O fanua o le tasi lena mataupu o lo o tele ai faasalalauga, a o faasalalauga tuulafoai ma o ni saunoaga tuulafoai e le faavae pe a fua i le polokalame lena. O isi faasalalauga ua fai mai o le a faatau le atunuu. O ai na te faatauina le atunuu? E faapefea ona fai lena mea? E leai se mea faapena e tupu. E le tutupu ni mea faapena. O le mea la lea lau Afioga i le Fofoga Fetalai í .

Afioga Hon Palusalua Faapo II: Lau Afioga i le Fofoga Fetalai o se mea e fia faamalamalama leaga ua faalua ona saunoa i ai le Sui Palemia i le mea lea.

FOFOGA FETALAI: Ou te manatu o lo o avatu le avanoa i le tatou í .

Afioga Hon Palusalua Faapo II: O le a le faatauina a o lau Tulafono e faatau ai?

Tofa Hon FONOTOE NUFESILI PIERRE LAUOFO: O lea e tau faamalamalama atu.

FOFOGA FETALAI: Malie le Taitai o le Itu Agai.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

Tofa Hon FONOTOE NUAFESILI PIERRE LAUOFO: O faasalalauga a ai, o lona uiga o faasalalauga a outou?

Afioga Hon Palusalua Faapo II: Aua le faia faamatalaga faauigalua e le tusa ai ma le Tulafono.

Tofa Hon FONOTOE NUAFESILI PIERRE LAUOFO: O lea ou te taua faasalalauga ia e salalau solo ma tusitusiga. E le o sese lau tala. A o fea la o le Tulafono Tau Faaofi o fai mai ai e faatau ni fanua? E leai se mea o fai mai ai e faatau fanua o le atunuu. Ona pau lava le mea lea e aumai iinei, silasila foif ..

Afioga Hon Palusalua Faapo II: Lau Afioga i le Fofoga Fetalai, silasila i le sese.

Tofa Hon FONOTOE NUAFESILI PIERRE LAUOFO: Onosai mai o lea se i faamalamalama atu le Tulafono Tau Faaofi. *(I le Taitai o le Itu Agai o lo o tulai e faauilavea).*

Afioga Hon Palusalua Faapo II: O fanua o le atunuu fanua o le Malo lea e faatau.

Tofa Hon FONOTOE NUAFESILI PIERRE LAUOFO: E leai se mea faapena.

Afioga Hon Palusalua Faapo II: E le o ni fanua o le Malo o fanua foi o le atunuu.

Tofa Hon FONOTOE NUAFESILI PIERRE LAUOFO: E leai.

FOFOGA FETALAI: Malie lau Afioga i le Sui Palemia se i fai atu lau tala lea. I le taotoga tonu e tataua ona i ai le tatou talanoaga ma le felafolafoaiga, ia malilie sui usufono ia mau le toovae. E talitonu o lenei mataupu, tuu le avanoa se i sausaunoa le Sui Palemia, o le sui lea o le Kapeneta e faamalamalama le Tulafono Tau Faaofi. Tatou te Fono i le ao ma le po iinei, e avatu avanoa mo outou ona outou tali lea, ae aua tou te naunau ta leaga e umi ai ona toso ma le malamalama ai le atunuu. O lea foi e taumafai mai le Sui Palemia e tali aua paga lea, ua ese le mea lea ua i ai ua muamua le taavale solofanua ae mulimuli le solofanua. O mea lava nei e tupu ai le vevesi o le atunuu ona o le muamua fai tala i fafo a o lea faatoa oo mai le Tulafono e talanoa.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

Ia malilie la sui usufono ia toa mai le tai, tuu pea le avanoa se i fola le Tulafono Tau Faaofi a le Sui Palemia ma le Matagaluega, ona tatou velo aso lea i ai ma taatia ai i lagotonu le tatou mataupu, ae a tatou o nei o le a amata le finauga ae e le i malamalama ó ia taatia laia. A manino lava le mata o le vai, ua toa foi outou finagalo.

Tulai mai lau Afioga i le Sui Palemia.

Tofa Hon FONOTOE NUAFESILI PIERRE LAUOFO: Faafetai lava i lau Afioga i le Fofoga Fetalai. O le tulaga lea, e tatau lava ona faamalamalama le vaega lea aua o fanua ma eleele o le atunuu o lea e manino.

O le 80% o fanua, o fanua faale-aganuu. O fanua la na e le mafai lava ona faatauina e se tagata. E matua, sa, sa taputapu lava i lalo o le Faavae tusitusia o le atunuu. O fanua ia o lo o pulea e matai o aiga. O o tatou tofi ia mai le Atua e le mafai ona faatauina lea e puipuia i lalo o le Faavae, ona o le silasila a outou tuua ma o tatou matua sa i ai i le Fono Faavae na tusia ai le Faavae o le atunuu. O lo o puipui i lalo o le Faavae, e faasa ona faatau fanua ia. O le 80% o fanua o le atunuu, o eleele ma fanua o le atunuu.

Se i fuafua ane la pe faapefea ona faatau fanua o le atunuu? O le isi 10% o fanua na o le Malo, a o le isi 8% lena e totoe ai o fanua umia saoloto. A silasila la i le polokalame, e agai tonu lava faaiuga a le Malo ia i le 10% lea o fanua o le Malo e mafai ona lisiina i se kamupani po o se tagata e agavaa i ai i lalo o le Tulafono Tau Faaofi lena ma le polokalame lena. A o lena foi 10% o lena ua tatou iloa, o lena e tele ina nofoia ma lisi e o tatou aiga mai tua ma Savaii. O lea foi e lisi e isi pisinisi ma kamupani a Samoa. E le o toe tele foi se vaega o totoe o na fanua.

O fanua umia saoloto e le au i ai le pule a le Malo i fanua e umia saoloto e tagata o le atunuu. Se i silasila la i le tulaga lea e i ai? Ou te le iloa la pe faapefea ona omai nisi faatau eleele. E le mafai ona fai lena mea - e matua le mafai lava.

Lau Afioga i le Fofoga Fetalai, ona ou oo mai lea i le tulaga lea i le maea o le tolu tausaga o le pemita lea nofomau. Ia manatua la o le tolu tausaga lena o lea e mataitu lelei e le Komiti lea sa ou taua le faagasologa o le atinae. E mataitu ma asiasi i ai, e vaai ma aumai lipoti i le Malo po o le a le tulaga tonu lea e faagasolo ai le polokalame lea i le atinae lea e faagasolo. E silasila i ai a maea le tolu tausaga lea ae finagalo le tagata faipisinisi e talosaga sona sitiseni Samoa, ona faatoa ave loa lea o lana talosaga. A o lena foi talosaga e avatu i totonu o le Komiti, iloilo ma sutesue lelei e le Komiti. E i ai foi le process o lena mea. E ese le process e talosaga ai le pemita tolu tausaga nofomau, ese foi le process e talosaga ai le sitiseni. A aumai foi la i totonu le talosaga mo le sitiseni, ona aumai foi lea iloilo e le Komiti ma sailiili. O mea taua la e silasila i ai le Komiti: muamua, e silasila i fuafuuga faataatitia mo le atinae.

18 FEPUARI 2015

Tulafono Tau Faaofi o Tulaga Tagatanuu i le Teufaafalagaluegaina o Tupe Mai Fafu 2014 – felafolafoga i luga o le faitauga faalua

O lona uiga o le investment plan lea sa aumai i le amataga. Pe sa usitaia ma mulimulitai i le investment plan, o fuafuaga ia o le atinae lea ua faatuina nei. O le tasi lena mea e silasila i ai le Komiti. Afai e faaletonu, e leai foi se sitiseni e maua.

O le mea la lea o lea e taumafai e faamatala atu ai le vaega lea, e le faapea a uma le tolu tausaga ona otometi lava lea ona maua le sitiseni, e leai. E le faapena, e i ai le talosaga, e i ai le Komiti e ave i ai le talosaga ma faatino galuega a le Komiti i le sailiiliga, suesue ma toe auiliili. O isi mea e silasila i ai o le tagata lea ma ona aiga po o le a le tulaga o i ai. O ni faamatalaga o ni tupe ua sueina faasuetusi po o financial statements. E tatau ona suesue lelei po o le a le tulaga o le atinae, a o le a foi le tulaga o lo o i ai i atunuu i fafo pe afai o i ai nisi ana pisinisi i atunuu i fafo.

Ia manatua o le tolu tausaga e fai sina umi. E i ai foi mea e tutupu i lena tolu tausaga. O faamatalaga tau tupe, o lipoti mai le Ofisa o Leoleo, o lipoti mai le falemai ma o mea na e silisili ona e manaomia e le Komiti ma le tele o isi faamatalaga, o faamatalaga e manaomia e le Komiti e faavae ai se latou fautuaga ina ia silasila i ai le Afioga i le Minisita ma auala atu i le Kapeneta e silasila i ai le Kapeneta ma fai se faaiuga talafeagai e tusa ai ma le talosaga. O le mea la lea e fia ave i ai le faamamafa, e le faapea a uma le tolu tausaga o le pemitā nofomau, ona otometi lava lea ona maua le sitiseni Samoa, e leai. E faasolosolo aua o lea lava e i ai le process e faasolosolo lelei ai ma le tulaga i le sailiiliga maeaea a le Komiti, due diligence.

O le tasi lea mea taua tele i le Komiti, e tatau ona silasila totoa le Komiti ma fai ana sailiiliga maeaea i le tagata lea. O lona uiga la, e le faapea e talia talosaga uma, e leai. E iloilo leaga o lea tatou te talanoa i le lumanai. Atonu lava o le a i ai ni talosaga e le talia, a o nisi talosaga o le a talia ma o le tulaga lena e i ai. A o le mea taua e silasila i ai le Komiti i talosaga ia ona e i ai foi mafuaaga e tilotilo i ai le Komiti e faaono mafai ai ona teena le talosaga. E pei la o mafuaaga nei, o le tuuina atu o faamatalaga sese i le Komiti. E silasila totoa foi i ai le Komiti po o sao ia faamatalaga e aumai i le Komiti pe sese. E o e fai a latou sailiiliga ma a latou suesuega. Pe ua i ai foi ni ana solitulafono matuia e le tatau ai ona tuuina atu i ai se sitiseni. Po o se tulaga foi lea e mafai ai ona le talia le tuuina atu o se sitiseni i tagata nei. O isi mafuaaga e silasila le Komiti pe faaono tulai mai ai se tulaga lamatia mo le pui puiga malu o Samoa.

E i ai foi isi faasalalaua ia sa ou vaai i ai ma ou faitau ai. Na fai mai e le iloa pe ua saofia mai ai i ina ni tagata faatupu faalavelave. O mea uma lava na e au i ai le silasila a le Komiti. E matua suesue maeaea uma ia ituaiga tagata pe i ai ni o latou aafiaga i mea faapea. O mea ia o lea ua faamalosiā e atunuu uma lava o le lalolagi. E siaki lelei pe i ai ni tagata faatupu faalavelave ma o tagata ia e taua o terorisi e feoi mai lea atunuu i lea atunu. O le mafuaaga lena o lea e fai ai foi a tatou siaki aua o le Komiti lena o lea e i ai a latou faiga faapitoa e sailiili uma ai tulaga ia.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

Afai la ae talia e le Komiti se talosaga, ona tapa loa lea o le tulaga e faamaonia ai le faanaunautaga o le tagata lea e faatu lana pisinisi, ona tapa loa lea o le 70% o le tupe faavae lea e tilotilo i ai. A faamalieina uma la vaega ia, ona agavaa loa lea o le talosaga a le tagata mai fafu po o le foreign investment lea e talosaga mai e fia oo mai e galue i lalo o le tatou polokalame leni, ma maua ai loa lona pemitā nofomau e tolu tausaga.

E faapena foi le sitiseni, e le otometi le sitiseni, e pei lava ona ou fai atu e i ai mafuaaga e silasila i ai le Komiti. E le faigofie, e le faapea e faapaole foi ona silasila le Komiti i talosaga faapenei. O tulaga ia e silasila totoa ma maeaea i ai le Komiti i vaega eseese uma ia.

FOFOGA FETALAI: Malie lau Afioga i le Sui Palemia, se i tuu atu lava le avanoa i le faauilavea a le Afioga i le Minisita.

Tofa Hon Tolofuaivalelei Falemoe Leiataua (Minisita mo Tina ma Tamaitai, Atinae o Nuu ma Afioga ma Agafesootai): Lau Afioga i le Fofoga Fetalai, e tele lava itu sa faanefu i le vaai ma ou te talitonu o se matau foi lena o le atunuu, a o lea e ese le manaia ma le manino o le folasaga. O lea foi la ua atoa ai le tali i le vala lea na saunoa i ai le sui usufono sa faia le tatou tatalo ananafi, e matua sese lava i Sini. E le otometi ma e le free foi ae e faatau.

O le mea la lena e tatau i le faifeau toe matai, ia fuafua lelei aua le pepeloa le atunuu, ioe. Aua ua matua ova le talapelo o le faifeau lea na faia le tatalo ananafi.

FOFOGA FETALAI: Malie lau Afioga i le Minisita.

Tofa Hon Tolofuaivalelei Falemoe Leiataua: E leai o le tala sao lau Afioga i le Fofoga Fetalai. O le tala saʻo lava lau tala, ua olegia le atunuu leaga o lea na faasao mai nei lava. Fai mai e free le sitiseni Samoa.

Afioga Hon Palusalua Faapo II: Lau Afioga i le Fofoga Fetalai, o le matua matuia o nei tuuāiga ua fai e le Minisita. E mataga ma le mafaufau i le faafofoga mai a le Atunuu. O le faifeauf ..

Tofa Hon Tolofuaivalelei Falemoe Leiataua: E le afaina.

Afioga Hon Palusalua Faapo II: O le auauna a le Atua. Se i vaai i upu le mafaufau ia ua fai nei?

Tofa Hon Tolofuaivalelei Falemoe Leiataua: Na filifili e sau i le Maota ona e le o se faifeau. Aua e te ó e le o se Kolisi o Faifeau le mea leni.

FOFOGA FETALAI: Malie lau Afioga i le Taitai o le Itu Agai, tuu mai o lea o le a ou tali atu.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

Afioga Hon Palusalua Faapo II: E ese lava le Tiakono Toeaina ia ese le faifeau. Fai ma le ava o le faifeau.

Tofa Hon Tolofuaivalelei Falemoe Leiataua: Na e au nei i Malua e te leí í .

FOFOGA FETALAI: Malie lau Afioga i le Minisita, o le agaga ma le faamoemoe ina ne i meaane ua tatou matau eseese. E faamalulu atu foi i le tulai mai o lau Afioga i le Minisita e tapa le finagalo o le na faia le tatou tatalo ananafi. E faamalulu atu, o le mea lea na tupu ananafi e le i lauga le susuga i le faafeagaiga a o le tatalo. Ia outou finagalo malilie, o a upu o le tatalo ma le faamanatu, e manatu tele o lona lava lea finagalo i le taulaga na ou tofia e molimoli ai le feau a le Atua, a o le faamasinoga o lea e faafofoga le atunuu ma tatou uma. Ona ou manatu ai lea, o le a le taumafaiga a le faafeagaiga i le aso ananafi i le tatalo na tuuina mai, a tatou o loa i le Mataupu Silisili e felefele ma lavelave lo tatou faauigaina o le Afioga Paia a le Atua. E manatu foi, ia malie lau susuga i le faafeagaiga taulagi o lea se i taumafai atu lau faamatalaga ona avatu lea o le avanoa.

E manatu foi leaga o lea ua saunoa le Afioga i le Minisita i lau Afioga e ala i le tatalo na tuuina mai. Ia malu aveva i fale i sou finagalo lau susuga i le faafeagaiga. Ou te le i soona fai atu foi ananafi ona o lou manatu i le maaleale o lenei mataupu, se i aumai se feau o le aso. O le ala tonu lava lena o lou tapa ma ua e tulai mai foi ma aumai le feau o le aso, ua faatusatusa ai mea faalelalagi lea tatou te agai i ai ma mea faale-lagi na fai ai le togiola tutasi e lo tatou Alii Faaola tatou te maua ai le ola e faavavau.

Silasila foi o lea na ou faalava i tulaga i le saunoaga a le Afioga i le Minisita ma lona finagalo. Atonu e sagatonu lau o le fo i lona finagalo ia te ia ma le faafofoga mai a le atunuu, ae ta te musu e tau leagaina se galuega ona o se tatalo na saunia i totonu o lo tatou Maota Fono. O lou agaga atoa lena e faamalulu atu ai foi i lau susuga i le faafeagaiga taulagi, ina ne i meaane ua tatou femisaai i le mataupu ua tulai mai, a o le mataupu o le tatalo lea ua fesiligia.

Se i tulai mai lau Afioga i se tasi o sui usufono mo Salega, Tofa Tapuai Toese Ah Sam.

Tofa Tapuai Toese Ah Sam: E le o afaina loŷu loto leaga fai mai Iesu, ōAmuia e tuuaifuaina.ō Ou te le o afaina la. E manino lelei lava lau saunoaga ananafi. O le feau, e le o se tatalo, ae na ala i le tatalo. Ua matauina foi i le tatou Fono, ou te le tatalo e pei o tatalo a isi e tauloto mea e leai se uiga, ae a e aumaia le faaaloalo i lou tagata faatauva, ona ou fesili lea i le Atua po o le a le feau. Na ona toe faamanatu la i le Palemene lenei le feau lea na aumai e le Atua ananafi. A outou faafofoga lelei i le feau, ua uma le galuega i le potu ma le atamai ma taleni na aumai e le Atua í

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

Afioga Hon Tuisugaletau Sofara Aveau (Minisita mo Fesootaiga ma Faamatalaga Tekonolosi): Lau Afioga i le Fofoga Fetalai, o le a tauau ina sese tele.

FOFOGA FETALAI: Malie lau Afioga i le Minisita o lea o le a uma mai ona avatu lea o le avanoa.

Afioga Hon Tuisugaletau Sofara Aveau: O le a tauau ina sese tele.

Tofa Tapuai Toese Ah Sam: E leai, leaga e tele le tuuaiga lea ua aumai. O lea la ou te manatu, e tatau ona fai sina au tala i le mafuaaga na e aumai ai le tatalo ma le feau. Na ona toe faamanatu la, ioe. Ua uma la taleni, ae a outou maua le feau na avatu e le Atua ananafi, ona tatou o lea i le Atua e faia le faaiuga o a tatou mataupu aua e i ai le ala e tonu ae tatou te fano ai pe a outou faafofoga i le feau ananafi. Ona faaiu loa lea, e leai so tatou taeao faatoa tatou fananau, ona ou fai atu loa lea i le sitiseni ua uma ona ofo mai le sitiseni o le lagi, ioe, ma e taugata tele. E free ia tatou, ae na faatau i le toto o le tamai mamoe. E taugata tele tatou ma e sao le Sui Palemia, o le filifiliga a le tagata lava ia. Aua e lua lava destination, o le afi ma le ola e faavavau.

O le a faaiu atu la lau tala, ou te le o afaina, a o le feau lea ua toe faamanatu atu. O tatou faatoa fananau mai ananafi, e gata lo tatou iloa. E i ai le ala e tonu i o tatou manatu, a o le a faaiu atu i le Ioane 34:6, òAua ua faapea lava ona alofa mai le Atua i le lalolagi, ua aumai ai lona atalii e toatasi ina ia aua lava ne i alu se faipule i le afi, ae ia o uma i le ola e faavavau.ö
Ia manuia le Fono.

FOFOGA FETALAI: Malo; e pei o le ala lena lau Afioga i le sui usufono. Na ou manao lava se i tulai mai le Minisita ma faaali lona finagalo e ala i lau tatalo. O lea la ua e tulai mai i le mea e faamalamalama, o lea la ua manino le mata o le vai. O si au lava folasaga ma le tatalo na tuuina mai ina ia faamanino le uiga o lau feau ma le mea ua tuuina atu i lou loto e faamalamalama ai le tatou mataupu.

Tulai mai lau Afioga i le Minisita mo Fesootaiga ma Faamatalaga Tekonolosi.

Afioga Hon Tuisugaletau Sofara Aveau: Faafetai, o tala atu ananafi i le Aso Sa, sa tatou faatsi uma lava i le maota tatalo ma saunoa ai faifeau ua uma ona faauuina ma tatou faalogologo ai i le feau taua. O i o le tatou Fonotaga faa-Palemene, matou te le fia faalogologo i nisi ituaiga lauga e pei o tau fai mai se tatou Aoga Tusi Paia, faamolemole o lena lava e i ai le avanoa tatou te o ai i le Aso Sa, e fai ai tala ma saunoa ai Faifeau ma faalogologo ai i le feau sao, ae taatia ia lana feau e fai i lana Ekalesia ma ona tagata, ae faasaosao o le feau faa-Palemene lea ua tatou i ai.

Afioga Hon Palusalue Faapo II: Lau Afiogai ...

18 FEPUARI 2015

**Tulafono Tau Faaofi o Tulaga Tagatanuu i le Teufaafalugaina o
Tupe Mai Fafu 2014 – felafolafoaiga i luga o le faitauga faalua**

FOFOGA FETALAI: Malilie sui usufono o lenei lava ou te taumafai atu e tau tata le tatou Fono i le moa o le ala, ou te talitonu foi e le tetena i o outou finagalo a ia malu ave i fale la outou faafogafoga i lea itu o le Maota ma le taumafai atu. O le agaga ma le faamoemoe ou te manatu ua taatia i le agatonu le tatou mataupu ma ua saunoa malamalama le na agai i ai le saunoaga a le Minisita, ou te mau lava au o tatou uma o tagata Kerisiano ma e mama mea uma lava i o tatou loto, e leai foi se tuaoi ma se vatapuia o lo tatou tautau o le Suafa o le Atua i taimi uma ma o le amiotonu lena. E le fesiligia pe tatou te talanoa i mea o le tino ma le agaga, ae le mafai lava ona misi lo tatou tautau o le Silisiliese o le atoaga lena o le tatou tautinoga. Ae manatu o le a faauma ai lea mataupu, ua manino ma malamalama le folasaga na saunoa i ai le susuga i le faafeagaiga ma lana foi tautinoga i le aso ananafi ou te manatu o se faamanatu taua mo i tatou, e le o se isi itu, tatou te filifili po o fea tatou te o i ai, o lena foi e nofofale ma oa i le Talalelei ma le Mataupu Silisili. O le a taatia lea mataupu ae tulai mai le Sui Palemia e faaaau le saunoaga.

Tofa Hon FONOTOE NUAFESILI PIERRE LAUOFO: Faafetai i lau Afioga i le Fofoga Fetalai, ona tatou toe foi mai lea i le lalolagi nei ma le tatou Tulafono Tau Faaofi. O le tulaga lena e pei ona ou talanoa atu, a uma loa sailiiliga a le Komiti ma ua silasila i ai le Komiti ua agavaa mo le pemitu tolu tausaga ona tuuina atu lea i le taimi o le tolu tausaga. A maea le tolu tausaga ona fai foi lea o le talosaga o le sitiseni ona toe suesue foi lea e le Komiti afai e agavaa ona fautuaina loa lea o le Minisita ma le Malo, ua tatau ona tuuina se sitiseni i le tagata faipisnisi mai fafo. O lona uiga e fai lava sina umi o lena process a o le sini autu o le atinae lea e faatu. O le tolu tausaga lea e mataitu lelei e le Komiti ma alu ai foi asiasiga a le Malo, e silasila i le faasologa o le atinae po o lelei ona faagasolo, po o mulimulitai i fuafuaga sa faataatia i le talosaga muamua na tuuina atu i le Komiti ma le Malo, o le tulaga lena e silasila i ai le Malo po o talafeagai mea uma. O le tulaga taua lea i le silasila a le Malo, ae le faapea foi la o nei sitiseni e tumau pea, e tusa lava pe i ai nisi tulaga ogaoga e tulai mai e tumau pea, a o lea e i ai le avanoa e mafai ona toe faaleaogaina le sitiseni, i mafuaaga tatau i lalo o le Tulafono, pe a faapea ua maua po o ua silafia e le Komiti ua i ai faamaoniaga o ni soligatulafono i nisi atunuu, soligatulafono matuia po o tulaga po o ni tulaga tau faasese i le Komiti, o lipoti faaletonu mai fafo poo faaletonu foi i Samoa nei e mafai a ona toe cancel le sitiseni, e leai la se mea e popole ai tele i lea vaega.

O le isi mea taua i le tatou polokalame lenei e tatau i le Komiti i masina o Iuni i tausaga taitasi ona tuuina mai se latou Lipoti faale-tausaga i totonu o le Maota lenei e auala mai i le Minisita ma le Kapeneta, e tuuina mai le Lipoti o a latou galuega ona aumai foi lea ma silasila i ai lenei Palemene ma soalaupule ma tagatagai i ai ma faasee ai i tulaga masani a Komiti Filifilia e fai a latou sailiiliga ma latou iloiloga, ona aumai foi lea o sa latou Lipoti i luma o le Maota e tusa ai ma galuega o lenei foi polokalame.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

E le faigofie aua e le o i ai se tulaga faapaole o lea foi e i ai i totonu o le mataupu tonu lena le mea e tau o le transparency. O le polokalame lea a le Malo, e aumai le Lipoti faaletausage ona faapena lea ona silasila i ai.

Lau Afioga i le Fofoga Fetalai, o le a faaiu atu se manatu e tusa ai o le faamalamalamaina o lenei Tulafono Tau Faaofi. Sa tele foi faasalalauga, na ou Malaga talu ai nei i Niu Sila ma Ausetalia, e tele lava faitioga i le faalogologo atu i leitio Samoa ma nusipepa Samoa i fafo i faitoga e faasaga i lenei Tulafono Tau Faaofi. Sa ma talatalanoa ma le isi faipisinisi na alu atu ma maua au i Ausetalia ona fesilisili atu lea i le Tulafono Tau Faaofi lenei. Ona ou tago lea faamalamalama i ai e pei.....e tele lava faitioga i le faalogologo atu i leitio i fafo ma nusipepa i fafo ó sa ma talanoa ma le isi fai nusipepa i Ausetalia, sa ou faamalamalama i ai le polokalame leni ina ia malamalama i le taua o le polokalame. Sa tele lava ana fesili e agai i Tusifolau ma le Sitiseni, ona alu alu lea ua tele ana fesili ona ou fai atu lea i ai, se amuia oe o taimi uma e te malaga atu ai i Samoa e te folau atu i lou tusifolau Ausetalia. Na vave lava le oso mai fai mai ioe, ua matou manuia tele i le tulaga lea o le fai o le tusifolau Ausetalia ma fai le tusifolau Niu Sila. Ona ou fai atu lea i ai, o lea lava e te faitio i tusifolau Samoa a o lena e te le o faaogaina le tusifolau Samoa a o oe o le tagatanuu o Samoa, o le maua lava faasoa ma ma talatalanoa ona ou fai atu lea i ai lelei, o matou e feoi lava i tusifolau e talosaga le visa i taimi uma, o lea e te faitio mai uso i lea tulaga a o lena e te fealua i le tusifolau Ausetalia e le afaina lea vaega, pau lava le mea taua o le Tulafono Tau Faaofi, ia maua ai ni galuega, e atinae le tamaoiga ma atinae le atunuu ma maua ai galuega a le fanau. O le tulaga lena ina ia siisii i luga le tulaga lelei o le tatou tamaoiga ona soifua fiafia lea o tagata uma.

Lau Afioga i le Fofoga Fetalai, o se Tulafono Tau Faaofi e lelei ma manuia ai le atunuu, o se faamalamalamaga lena o le tatou Tulafono Tau Faaofi. Ia manuia tele le Fono.

FOFOGA FETALAI: Malo faafetai i le saunoaga manino a lau Afioga i le Minisita e ana le Tulafono, e manatu foi ua manino le faafofoga a le Maota i lenei taeao e tusa o lenei Tulafono Tau Faaofi taua. A o le i tuuina atu le avanoa i sui usufono mo felafolafoaiga e tusa ai o tulaga masani, e tatau pea ona avatu le fautuaga a le Fofoga Fetalai, ina ia manino le faasologa o lenei tulaga taua. E tulai mai lava le sui usufono ma faaali lona finagalo i le mataupu e ala i le Tulafono Tau Faaofi. O le talitonuga o le Fofoga Fetalai, ua uma ona outou faitau uma a outou Tulafono Tau Faaofi, aua ne i ai se tulaga e aumai i luga o le le atoatoa ina ia mafai ai ona tulai atu foi le Malo e faamalamalama atugaluga o lo o i ai le Tulafono Tau Faaofi.

O le tulaga lena ina ia taoto i lagotonu ina ia aua ne i i ai se taimi e tulai mai ai se faafinauga i lea mataupu. Ina ia aumai lo outou finagalo ma le atugaluga e uiga i le Tulafono ma avatu le faamalamalamaga a le Malo, ma tatou faasee foi i le isi avanoa lona lua o tatou Komiti.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

O a tatou Komiti e agai uma i ai finagalo ma manatu tusitusia e le gata i le Palemene a o le mamalu o le atunuu, ona atili manino lea ma malamalama le tuuina mai o le Tulafono Tau Faaofi a o le i faaiuina. E tuuina atu le faamatalaga leni i le tatou Maota ina ia malamalama lelei. E matau atu e le i taitai ona uma le folasaga a le Malo a ua atugalua finagalo o sui usufono. E le na ma le laina o lea lava e oo mai i le taimi leni o tatou Fono ua salalau solo tala o leni Tulafono Tau Faaofi ma leni Lipoti, o lea e taumafai le Malo e faapupula ma faamalamalama o le tele o faamatalaga ua alu e le o tutusa ma le agaga o le Tulafono Tau Faaofi. O le tiute o le Palemene ma le Maota ma outou o sui usufono, fai le mea e taoto ai i lagotonu le tatou mataupu, ae aua tatou te aumaia tala o le laumea toli i le savili, o le laufa le aina ma le pola e motu i tua, ia e aumai ai e faatupulaia, o le Tulafono lena. O lea ua tatou faafofoga lelei i le faamalamalama a le Afioga i le Minisita e ona le Tulafono, o lea ua outou silasila le paia ma le mamalu o a outou Afioga i sui usufono, o le tatou Tulafono lena, word by word, clause by clause, ia ona aumai lea o lo outou finagalo i luga o le mea lena, ae aua tatou te o i le faatulaga lautele pei e faafoliga o tala ia e fai i fafo, o le tatou Tulafono lena. O lea faatoa manino ma malamalama Samoa i le mataupu leni, o lea ua taatia i lagotonu le taeao leni.

Ua avanoa le Maota mo se saunoaga. Tulai mai lau Afioga i le sui usufono mo Faasaleleaga Nu. 2. E 20 minute o le sui usufono, saunoa sao e ala i tulaga o le Tulafono.

Susuga PAPANII LIO FAAVAIVAIOMANU TAEU MASIPAU (Faasaleleaga Nu. 2): Faafetai lau Afioga i le Fofoga Fetalai, malo foi saunoa ma faalaeiau foi aua lo tatou faamoemoe i leni Tulafono, ia ou te talitonu lava, e sao lelei lava le saunoaga a lau Afioga. O leni foi sui usufono mai Faasaleleaga Nu. 2, e agai tonu lava i vaega o le Tulafono, e le alu mamao lava se lauga a Faasaleleaga Nu. 2. O leni Tulafono, faafetai i lau Afioga i le Sui Palemia mo leni Tulafono ua faataatia. Ia ae ao foi ona avatu ni lagona o leni itumalo ma ua uma foi ona talatalanoa ma le itumalo, o lea foi e faafogafoga mai lou itumalo, ia o lea o le a ou taumafai e fofola atu lo outou finagalo na outou filifilia ai foi au ou te sau i le Palemene.

Lau Afioga i le Fofoga Fetalai, ua manaia le saunoaga a le Sui Palemia i le agavaa o i latou po o investors e omai i totonu o le atunuu, o lea ua faataatia mai ai se tupe maualalo e \$4miliona, na saunoa foi le Afioga i le Sui Palemia, o le tasi lea sini autu o le faatosina. Ou te talitonu lau Afioga i le Fofoga Fetalai, o le taimi nei i le tatou atunuu ua le o toe talanoa i se \$4miliona po o se \$10miliona, ua tatou talanoa i le \$700miliona i le taimi leni e fuafua i le tatou Tala o le Tupe i le taimi nei, o lea ua tatou oo i le \$700miliona, afai la o le silasila lea a lau Afioga i le Sui Palemia i tagata e omai i totonu o Samoa, o le a le mea e le tuu ai i le \$100miliona pe afai ia nei lava tamai \$4miliona e le tele, i lau na tilotilo i ai, a ua tatou o e faatosina mai tagata mai fafo, tatou te le o toe taaalo i ni \$4miliona i le taimi leni ua tatou taaalo i le fia selau miliona.

18 FEPUARI 2015

Tulafono Tau Faaofi o Tulaga Tagatanuu i le Teufaafalaluegaina o Tupe Mai Fafu 2014 – felafolafoaiga i luga o le faitauga faalua

O le tasi lena agaga ua ou tilotilo ma vaavaai i ai pe afai e moni le saunoaga a lau Afioga i le Sui Palemia, tasi lea auala o le faatosina mai, matuai faatosina mai i tupe, tuu i ai le \$100miliona po o le \$200miliona. O le isi itu o lea ou te vaai ai i le Tulafono, o lea ua manaia le vaevaega mai i le agavaa, ioe, i le agavaa lea, o lea e tau mai le \$4miliona. E i ai isi mea na e i lalo ifo e i ai le mea o le \$2.5miliona, e i ai isi mea tai \$1miliona, ne i te i ua faamataali mai i luma le \$4miliona, a o la e maua avanoa o isi mea i lalo ifo i le \$2.5miliona ma le tai \$1miliona.

Lona lua, o lea na taua e lau Afioga i le Sui Palemia le fanua í

FOFOGA FETALAI: Tulai mai lau Afioga i le Sui Palemia.

Tofa Hon Fonotoe Nuafesili Pierre Lauofo: Lau Afioga i le Fofoga Fetalai, e lelei lava le tatou o e matafai. O lea ua uma ona faamalamalama atu ia vaega, ioe, pei ona ou fai atu, o le \$4miliona ia pei o se fuainumera mauualalo, ae alu lava \$100miliona, \$200miliona, \$400miliona, e leai se tapulaa o le alu i luga. E leai se mea e popole ai fua i lena tulaga e le popole. O mea ia e te taua o le \$2.5miliona, e le tau faamatala atu o lau susuga foi o le loia o lena e te malamalama lelei i le faitau i le Tulafono, ni mea foi ia pei ni minimum amount e deposit i le amataga, a o le alu ia i luga e le taofiofia le atinae o le atunuu, e matua atinae le atunuu.

FOFOGA FETALAI: Tulai mai le sui usufono mo Faasaleleaga Nu. 2.

Susuga PAPALII LIO FAAVAIVAIVOMANU TAEU MASIPAU: Faafetai, o lea ua tau faapulapula mai o le ala foi lena o lou taua atu o le \$2.5miliona, o lena ua e toe saunoa mai e lelei le alualu i lalo, ae ui o lea, o lea ua silafia e lau Afioga le agaga.

Ona ou oo mai lea i eleele, o lea ua saunoa manino lau Afioga i le Sui Palemia i eleele o le Malo, o lea ua manino, e matua manino lava, na o eleele o le Malo lea e faasino i ai le faamoemoe lenei. Ae i ai le isi vaega lena e i le Tulafono fai mai e i ai mea o eleele ua faatonuina po o prescribe land e mafai ona faatau e mafai ona lisi toe faatau. O le vaimea la lena e le o manino ai lou sui usufono, a. ne i te i uafí .o lona uiga e i ai se isi auala e ono oo i ai, a o lea ua manino e mafai ona lisi ae na o fanua o le Malo. Ae pau lava se tala i ina i le vaimea lena, ia manatua foi o lea sa fai nai a matou talosaga i nai fanua foi ia mo nai itumalo, o lona uiga la o le au tele tupe nei ua fao uma ae leai ni tatou itumalo.

FOFOGA FETALAI: Malie lau Afioga i le sui usufono mamalu, se i tuu atu le avanoa i le faasaoga a le Afioga i le Minisita mo Punaoa Faanatura ma le Siosiomaga.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

Tofa Hon Faamoetaulao Lealaiauloto Ulaitino Faale Tumaalii (Minisita mo Punaoa Faanatura ma le Siosiomaga): Faafetai i lau Afioga i le Fofoga Fetalai, e leai foi se manatu e faalavelave a o saunoa le sui usufono mamalu, ae ou te iloa o le a agai atu i le tulaga lea e avatu ai se faamalamalama foi lea. O tulaga o le Tulafono lenei o lea e sao o mea o eleele o le Malo, o lea faatoa pasia nei e le Kapeneta le tulaga e le toe mafai ai ona toe faatau ese se eleele o le Malo i le mea ua i ai nei. O le tulaga lena o lo o i ai, na ona lisi i le mea lea, se i vagana la ia eleele foi ia pei ona faapupula atu foi e le Sui Palemia, ia eleele foi ia tumaoti umia saoloto, aua e pule lava latou i o latou fanua pe faatau ae o e nofomau i isi atunuu i fafo. Pei o le tulaga lena na ona faamanatu atu aua o lea e sao ai, o le tali foi lena na avatu ou te iloa o le sui usufono lava lea na aumaia foi le mataupu lea, o lea ua ou toe faamalamalamaina ia le tulaga lea. Ma lou faaloalo lava.

FOFOGA FETALAI: Malo faafetai i le faamanatu a lau Afioga i le Minisita o lo o vaaia eleele o le tatou Malo.

Afioga Hon Palusalua Faapo II: Lau Afioga i le Fofoga Fetalai o se mea e fia malamalama ai.

FOFOGA FETALAI: Ia saunoa le sui usufono.

Afioga Hon Palusalua Faapo II: Po o le FK po o le Tulafono e malosi, o lea e i i i le Tulafono, i le Schedule 5, including purchasing, eleele o le Malo. O lea ua saunoa mai ua fai le faaiuga a le Kapeneta, a o lea e matamata tetele i i i le Tulafono e mafai ona faatau o eleele o le Malo.

FOFOGA FETALAI: O lea ua maua atu lau Afioga i le Taitai o le Itu Agai, se i tulai mai lau Afioga i le Minisita.

Tofa Hon Faamoetaulao Lealaiauloto Ulaitino Faale Tumaalii: Lau Afioga o lea e galulue nei ia le Matagaluega e sui le Tulafono o le Lands, Survey ma le Siosiomaga mo le suiga lea e tuu i ai, a? Ma lou faaloalo lava.

FOFOGA FETALAI: O lea ua saunoa manino le Minisita e ala i alafua a le Kapeneta ua faataatia e le toe faatau se eleele o le Malo, o le tatou Tulafono foi lea e tau fai e le i pasia, o lea e fotuai mai le Tulafono o lea faatoa agai mai, a o le faamanatu a le Minisita mo Punaoa Faanatura ma le Siosiomaga, ia atonu e uma ona toe fetuunai lea i le tulaga o lo o ua taatia mai ai le Tulafono fou o lea ua tuuina mai.

Tulai mai le sui usufono mo Faasaleleaga Nu. 2. Malo faamanatu i lau Afioga i le Minisita.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

Susuga PAPALII LIO FAAVAIVAIONANU TAEU MASIPAU: Faafetai, e le o manino lou sui usufono i le faamalamalama a le Minisita, ae ui o lea, leaga o au e see lava agai i luma, ae i se taimi tatou talatalanoa auiliili lea i ai i le tulaga lea ua aumai.

Ona ou oo mai lea i le saunoaga a le Sui Palemia i mea o Pemita lea amata i le nofomau tolu tausaga, ona faatoa talosaga lea i le sitiseni faaleaganuu. A silasila i ai, o lea e aumai ai le avanoa o le investor toe sau ai ma lona toalua, e manatua la o tama la e i o e tele tupe, a sau la e lua toalua, tolu toalua, o lona uiga e lavea uma lava i le talosaga lea e tasi. O le isi meaí ..

Tofa Hon Fonotoe Nuafesili Pierre Laufofo: Lau Afioga i le Fofoga Fetalaií í

Susuga PAPALII LIO FAAVAIVAIONANU TAEU MASIPAU: Oi.

FOFOGA FETALAI: Se i tulai mai lau Afioga i le Sui Palemia.

Tofa Hon Fonotoe Nuafesili Pierre Laufofo: Ou te le iloa po o fea lea e taga ai ia mea o le tailua taitolu toalua, o lena e silafia lelei lava e le sui usufono mamalu, o lea e i ai le tatou Tulafono o mea o faaipoipoga, o lea e manino le tulaga o faaipoipoga, e tasi lava le toalua faaipoipo, ioe, e tatou te mulimulitai la i tatou lava Tulafono, e le aumaia la Tulafono a isi atunuu e fai ai tatou Tulafono iinei, o le Tulafono a tatou e tatou te mulimulitai ai, ma le tele o atunuu o le lalolagi ia ou te le iloa i ai po o fea, a o le tele lava o atunuu ia e tatou te faipaaga e tai tasi lava toalua, ou te le iloa la po o fea lea na te silafia ai ia mea o le tailua toalua, po o lena e te mafaufau i la outou itu ma la outou vaega, po o le a le sao o lena mea, ioe, a o mea na e silasila i ai le Komiti, a, e le taliaina foi e le Komiti ni mea faapena.

FOFOGA FETALAI: Ia tulai mai lau Afioga i le sui usufono mamalu e faaauu mai le saunoaga.

Susuga PAPALII LIO FAAVAIVAIONANU TAEU MASIPAU: Malo, faafetai foi i le Afioga i le Sui Palemia. E manatua foi o lea ua tatala le au Mosalemi e omai i totonu o le tatou atunuu, o le vaega lena eí í

Susuga Hon Tuilaepa Fatialofa Lupesoliai Aiono Neioti Sailele Malielegaoi: (Palemia): Lau Afioga i le Fofoga Fetalaií ..

FOFOGA FETALAI: Se i tuu atu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: E le galo ia te au le maliu o le isi sui usufono, na ou alu fai le molimau, ia ona tulai ae lea o si loomatua fai mai, sa ou fia iloa pe i ai ni mea nuti a si ou toalua.

18 FEPUARI 2015

**Tulafono Tau Faaofi o Tulaga Tagatanuu i le Teufaafalua o
Tupe Mai Fafu 2014 – felafolafoga i luga o le faitauga faalua**

Ae pau lava le taimi ou te iloa ai, o le gasolosolo mai o fale tama e fai a latou sii, ona faatoa ou iloa ai lea. O lea la i le susu mai o lau Susuga Papalii, e faatoa iloa foi pe fia ni ou toalua ina ua e oti, e le iloa pe tele ni au mea nuti o fai ae le o iloa.

FOFOGA FETALAI: Ia tulai mai le sui usufono mamalu e faaauau le saunoaga.

Susuga PAPALII LIO FAAVAIVAIOMANU TAEU MASIPAU: E faamalulu atu i le saunoaga a le Afioga i le Palemia, e leai o la e sitiseni uma lava, e leai lava ma se isi e le o sitiseni, sitiseni uma lava i Samoa, e leai lava ma se isi o talosaga mai fafo o la e sitiseni uma lava i totonu o Samoa. Ae o le a ou see ese lau Afioga i le Fofoga Fetalai .

FOFOGA FETALAI: O lena o le a tauau ina aliali mea e le tatau onaí .

Susuga PAPALII LIO FAAVAIVAIOMANU TAEU MASIPAU: Lau Afioga i le Fofoga Fetalai, e i ai la le isi vaega o mea lava ia o le talosagaina o mea nei o pemitā. A silasila i ai lau Afioga i le Sui Palemia o lena e i ai le avanoa o mea o tamaiti fai, step child, e ese lava tamaiti o la e liliu faaletulafono, ae o la e sau ai ma tamaiti fai, ia a tau la tamaiti fai, a faapea la mo le faataitaiga, ua sau nei la le tagata e tele tupe aumai ana tamaiti fai e 20, o lona uiga o lena 20 o le a ola lava iinei ia tatou ma o fao tatou avanoa sikolasipi a tatou fanau e o ai i fafo, aua o le mea moni, o le mea lena e tatou te oo i ai i le lumanai, ioe, pe a faapea o le a sau le tagata i totonu e tele tupe ma aumai ana tamaiti fai, e ola faatasi iinei ma ola i le pemitā lea ma tatou mea nei.

O lou lava sui usufono lau Afioga i le Fofoga Fetalai, e ese lou faatauaina o le tatou aganuu, e ta te popole lava ta ita i mea faapenei, aua o le mea moni e sao lava le saunoaga i le atinaeina o le tatou atunuu, ae i ai ona tua atu foi, ioe, e tatou te vaavaai i le tatou aganuu, ne i te i ua omai uma nei tagata i le lumanai ma a latou fanau fai, te i ua ono tutupu mai ai ni vevesi i le lumanai o le tatou atunuu, o le mea lena o lea ou te popole ai i le mea lea, silasila i ai lau Afioga, o lena e tatala mai i le Tulafono mea na, o le step child, o lona uiga, e sau lava le investor aumai lona toalua, aumai lana fanau moni, toe aumai ma tamaiti fai a, i totonu o le atunuu i pemitā ia e i totonu o le Tulafono lea. O le a ou see ese i le itu lea a o lea ua faafofoga mai le Afioga i le Sui Palemia, tasi lena vaega o lea e sau i le Tulafono.

O le isi mea, ua e silafia ua tele faamai eseese ia ua tutupu mai i le lalolagi, ne i te i ua avea le soona aumai o tamaiti fai ma aumai nei faamai i totonu o le atunuu í

FOFOGA FETALAI: Malie le sui usufono mamalu, se i avatu le avanoa i le Sui Palemia.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

Tofa Hon Fonotoe Nuafesili Pierre Laufofo: Lau Afioga i le Fofoga Fetalai, a foi lea sa faamatala auiliili atu le tulaga o agavaa, e manaomia lipoti a foma'i ma falemai, a lea sa faafofoga mai lava, o lea e aumai i le Tulafono, tasi lena mea e silasila totoa i ai le Komiti ma tapa e le Komiti, ia ona faavae ai lea o latou fautuaga, ioe, e matuai auiliili lelei tulaga na, a? O tamaiti foi ma tagata faipisinisi faapea, e leai se mea e tatou te popole ai, o fea le mea o le ai .o tagata faipisinisi faapenei o lea tatou te malamalama, e tele lava ina i ai a latou pisinisi i isi foi atunuu, a, e le faapea na o Samoa o lea e faatu ai se pisinisi, ioe. A tatou tilotilo ia Yazaki, ia e le o faapea o nofo nofo Yazaki fia sau fua e fia sitiseni Samoa, e le o faapea foi o sau ma aumai sana fanau, a o lea ou te le o manatua, pei lava e na o le faa-tasi ona oo mai Yazaki i Samoa pei lava o le 1997 lea ou te tau manatua, pau lava lena o le taimi na oo mai ai i Samoa, ae le i sau foi ma aumai sana fanau, ioe, e leai la se mea o le a popole ai faapea o le a lolofi mai tagata, e leai, aua tatou te talanoa i se mea pei e tauaafefefe, a, a o mea foi ia e tatau ona realistic i mea faapea, a, tatou tilotilo i mea la e tutupu. Pei o le tulaga lena lau Afioga i le Fofoga Fetalai.

FOFOGA FETALAI: Malo.

Afioga Afoafouvale John Moors (Palauli): Lau Afioga i le Fofoga Fetalai ..

FOFOGA FETALAI: Se i tulai mai le sui usufono mamalu. O fea e agai ai leí ..

Afioga Afoafouvale John Moors: O se mea e fia faasao lau Afioga.

FOFOGA FETALAI: I le saunoaga a le sui usufono mamalu?

Afioga Afoafouvale John Moors: O lea lava.

FOFOGA FETALAI: Ia tulai mai le sui usufono. Malie lava Papalii se i avatu leí ..Tulai mai le sui usufono mo Palauli.

Afioga Afoafouvale John Moors: Leai e le o se mataupu ogaoga ae leaga e i ai lava e faalele ae i ai foi e matau. O le manatu foi ma le uiga tonu lava o le upu faa-Peretania lea o le step child, e le o se tamaitiiti fai pe a faa-Samoaina, tusa o se tamaitiiti po o se atalii o le ua faaipoipo mulimuli ane ae o lo o i ai ia le atalii le tamaitiiti lena po o se tama a le fafine. O le eseesega na o le step child ma le adopted child. O le mea lena ua ou tulai atu ai ma lou faaaloalo lava.

FOFOGA FETALAI: Malo. Tulai mai le sui usufono mamalu.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

Susuga PAPALII LIO FAAVAIVAIONANU TAEU MASIPAU: E le i tali le Sui Palemia o lea e malamalama lelei lava i le mea lea o le step child, a o lea ua tali lou uso a sui usufono, leai, o le step child lava o se tamaitiiti fai, afai o se tama a se isi fafine, o le tamaitiiti fai, ioe, e le aloaia faale-Tulafono le mea e tau o le step child, ioe, e le aloaia faale-Tulafono, o lea ua fai atu ai, ina ia malamalama lou uso i le mea lea. Ia lau Afioga i le Fofoga Fetalai í

FOFOGA FETALAI: Se i tulai mai le Sui Palemia.

Tofa Hon Fonotoe Nuafesili Pierre Lauofo: Lau Afioga i le Fofoga Fetalai, e aloaia faale-Tulafono, ioe, e faaipoipo loa i se isi foi faaipoipoga mulimuli ane, ia ona aloaia lava lea faale-Tulafono le tulaga lena, ioe.

FOFOGA FETALAI: Tulai mai le sui usufono mo Faasaleleaga Nu. 2.

Susuga PAPALII LIO FAAVAIVAIONANU TAEU MASIPAU: Pe fefoifoiai lava le Sui Palemia, e le o sao lava, o lea e sao le faamalamalama lea ua ou fai atu ai.

Ia lau Afioga i le Fofoga Fetalai, ona ou oo mai lea i le mea lea o le solitulafono lea sa taua e le Sui Palemia. A silasila i ai i le Tulafono, a omai i totonu, ona silasila lea o le Komiti le solitulafono mai lava i le 500 iunite po o le lua tausaga pe a solitulafono i fafo tagata e fia omai. Ae a oo la ina cancel le pemita lea, ua tuu atu la i luga ua le lua tausaga a ua tuu atu i luga seiloga e lima tausaga solitulafono ona faatoa mafai lea ona aveese. O le uiga o lau tala, e mama le aumai i totonu, ae a oo ina aveese atu, ua sii i luga le maualuga o solitulafono. O le agaga lena o lea ua ou tilotilo au ma ou vaavaai i ai, ona sa tatau ona maualuga le faaui mai totonu, ae maualalo le aveese atu i fafo. A o le mea lea ua i ai nei, ua maualalo le aumai totonu ae maualuga le aveese atu i fafo.

O le isi mea lau Afioga i le Fofoga Fetalai, o le tulaga lea i solitulafono aua o le mea moni lava o lea ua manino le omai i totonu o le investor ma lona toalua ma lana fanau, ae a oo loa la i mea ia o solitulafono, a silasila i ai lau Afioga i le Sui Palemia, na o le investor, a ua le lavea le toalua ma le fanau pe a silasila i ai le Komiti i le mea lea. E lelei lava o lea ua avatu i lau tilotilo i le Tulafono Tau Faaofi, o lau tilotilo i ai, pei lava na o le investor lena e lavea i le mea lena, ae ua le aafia le toalua ma le fanau pe a oo i le taimi e fai ai faaiuga e aveese atu ma tatou.

Lau Afioga i le Fofoga Fetalai, i lou lava sui usufono, e lua lava itu e tilotilo i ai, o itu lelei ma itu faalelelei. E pei o le agaga foi lea o tatou felafolafoaiga, e ao foi ona faailoa atu itu e lelei ai. O lea foi ua saunoa manino lau Afioga i le Palemia, e fesoasoani mo le tatou tamaoiga e maua ai tatou tupe. A o le fesili lava a lou sui usufono, na pau lea o le auala e maua ai a tatou tupe? E tele ma anoanoai faamanuiaga ma auala e ono maua ai tatou tupe. I lau lava vaavaai i le tatou atunuu, e tele isi auala e maua ai, ae pei o le mea lea e popole ai lou sui sufono o lona itu faale lelei.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

A o le agaga lena i lau vaai ma lau tilotilo i ai a lou sui usufono, e sao e maua ai le fesoasoani mo i tatou, a o ona tua atu, pei o le agaga lena, a o lea lava e tele isi mau auala. E tatou te faamoemoe i le Atua, tatou te ositaulaga i le Atua e maua mai ai se fesoasoani mo tatou, aua po o le a lava lenei Tulafono Tau Faaofi, e le mafai lava e lenei Tulafono Tau Faaofi ona faatupe a tatou atinae, e le gafatia lava e nei Tulafono Tau Faaofi ona faatupe a tatou atinae ma a tatou mea tetele.

FOFOGA FETALAI: Malie le sui usufono o lo o saunoa se i tuu atu le avanoa i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, ua faalua pe faatolu ona saunoa le sui usufono e tele isi mau auala, se i aumaia ni auala se sefulu o e mafafau i ai?

FOFOGA FETALAI: Tulai mai le sui usufono e faaauau le saunoaga.

Susuga PAPALII LIO FAAVAIVAIOMANU TAEU MASIPAU: Lau Afioga i le Fofoga Fetalai, e tele auala, tele auala. Ia o le auala muamua, na o le tasi lea o le a avatu leaga o lea o le a umi ai fua ma fao ai lou taimi. O le...

FOFOGA FETALAI: Malie le sui usufono se i tuu atu le avanoa i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, afai ua tele le sefulu, tuu ane i le iva.

FOFOGA FETALAI: Tulai mai le sui usufono, aumai auala e iva Papalii, o le manaia lena ma le...o lea e fia faafofoga le Malo i lau fautuaga, lelei tele lau fautua. Malie, se i tulai mai Lealailepule.

Tofa Lealailepule Rimoni Aiafi: Lau Afioga i le Fofoga Fetalai, o se mea e fia... E leai o lau fautua i le Afioga i le sui usufono mamalu, ave taitasi i ai, o le a tele ina popoto le vaega lea ia matou.

FOFOGA FETALAI: Ia, tatala maia le ato ponapona o atinae lea e te nofo ma oe. Saunoa Papalii.

Susuga PAPALII LIO FAAVAIVAIOMANU TAEU MASIPAU: E tele auala. O le auala muamua lava, fai lelei a tatou Faalapotopotoga ia, tatou Faalapotopotoga foi ia e maua mai ai tatou tupe, e toe maua mai ai nisi a tatou seleni.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

O isi auala, o tai i le tatou Matagaluga o le Tiute. A vaai faalelei ma puipui, o lea na fai le matou Komiti i le tausaga na tea nei, o le tele ia o isi auala e ono maua ai le fesoasoani a? Ia faatasi ai ma le tatou tatalo i le Atua e maua mai ai le tele o auala.

FOFOGA FETALAI: Malie le sui usufono se i tulai mai lau Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e lua lava fautuaga a le tatou Alii, o le auala muamua, e mafai ona e move mai i lou faatuatua, o auala muamua na. A o le auala lona lua, a o le i fauina sou fale, nofo lelei i lalo ma faitau au tupe. O le a le uiga o lena mea? E oo loa i mea fau, ona aua lea e te faaaogaina le fautuaga muamua, ae oo loa i le fautuaga lona lua, nofo loa i lalo ma faitau au tupe. O lea la na ou fesili atu ia te oe e aumai au auala, ae aumai e le o ni auala fou. O auala lava o lea e fai e le Malo. Se i vaai i lou faatamala, ua matua vaivai atoa lau tapenaga i lena taeao.

FOFOGA FETALAI: Ia, tulai mai le sui usufono o lea ua manino au auala ae agai i le...

Susuga PAPALII LIO FAAVAIVAIVOMANU TAEU MASIPAU: Ia manatua lelei, o auala a le Malo o tatou auala uma lava na. A o le manaia ia o le areto o le ola na ou faalogo nei i ai i le taeao, fai mai a....

FOFOGA FETALAI: Malie le sui usufono se i tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Leaga na ou taua loa auala e lua ia, ou vaai atu loa i le Susuga i le Faifeau failotu ananafi, na o le ioio mai lava....

FOFOGA FETALAI: Tulai mai Papalii e faaauau mai le saunoaga. Ia malie se i tuu atu le avanoa i le Afioga i le Minisita. Tulai mai Magele.

Afioga Hon Magele Mauiliu (Minisita mo Aoga, Taaloga ma Aganuu): Lau Afioga i le Fofoga Fetalai, ou te tulai atu ma le agaga faaloalo ua uma le 20 minute o le sui usufono.

FOFOGA FETALAI: Ia, tulai maia le sui usufono mamalu.

Susuga PAPALII LIO FAAVAIVAIVOMANU TAEU MASIPAU: Faafetai i lau Afioga i le Fofoga Fetalai, ou te talitonu lava o le avanoa ua aumai, e ao foi ona avatu so matou sao, e talitonu e taua foi lena Tulafono Tau Faaofi.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

E le o se sao ina ia faaleaga ai le Tulafono Tau Faaofi, a o le sao ina ia fesoasoani i le tatou Tulafono Tau Faaofi. O le tulaga i lau vaavaai i ai, o lou lava sui usufono ou te popole tele i mea ia, o lea ou te vaai atu ua maua ai ma le avanoa o le afaifaatoaga, mea lava ia tau faatoaga. A sau nei la le tagata e tele tupe, fai le maumaga talo mo se faataitraiga. O lona uiga, ua leai se mea e agai i ai nai o tatou tagata ia lea e i le maketi lea e maua ai latou talo, o le a sau foi le tama lena sasaa i le maketi maua a latou tupe. Aua e i ai le isi faifeau e fai lona maumaga, e tomumumu lava le au faatau fai mai, tele mea e tigaina e fai latou peleti ae toe sau foi aumai ana tautalo i i o lea e tau sue atu ni tautalo e fai ai lona peleti. E faapena uma lava le mea e oo i ai. O lona uiga, e oo ina....

FOFOGA FETALAI: Ou te faamalulu atu i le saunoaga a le sui usufono mamalu, aveese le upu faafeagaiga, leaga o lea e maitau foi le atunuu i se isi tulaga ne i meaane ua tauleagaina le va feagai ai o tatou ma le Afaigaluega, ae faaoga se isi faifaatoaga matua. O lea foi e tapuai mai le Afaigaluega ne i meaane ua faamanualia ai finagalo.

Malie lau Afioga se i tulai mai le Afioga i le Minisita mo Faatoaga ma Faigafaiva.

Afioga Hon Le Mamea Ropati (Minisita mo Faatoaga ma Faigafaiva): Lau Afioga i le Fofoga Fetalai, tasi lea mea o lea e taumafai malosi lava le Matagaluega e fai, o le uunai ia tele a tatou faatoaga ma tatalo i le au faafeagaiga ia tautuana outou nuu na e paie tagata, ia tausolomua ia te outou ona outou o e faataitai i ai le faiga o faatoaga. E mafai ona lauina atu le mau faifeau la e i Savaii o la e matua o e uunai o latou nuu e faifaatoaga. Masalo o le faifeau lea e te saunoa i ai o le faifeau lea foi ou te manatu foi au i ai. E faapena mea o faifeau, o latou o taitai e taitaia autalavou, fesoasoani i le au paie o nuu, e uunai le faiga o faatoaga. Faafetai lava i le faifeau lea e te saunoa i ai o lea e fai ia ma faataitaiaga.

Ia o si au fesoasoani atu lena i lau Afioga i le sui usufono.

FOFOGA FETALAI: Ou te manatu ua malamalama lou finagalo Papalii, ae faaiu maia toe lua ou minute, faaiu mai le saunoaga o lea ua manino lea tulaga i le taulamua o Susuga i Faafeagaiga mo le atiaeina o faatoaga.

Susuga PAPALII LIO FAAVAIVAIOMANU TAEU MASIPAU: Faafetai. E leai, e faamalulu atu foi i lau Afioga i le Fofoga Fetalai faapea foi le Afioga i le Minisita, e leai, o lea ua saunoa le Afioga i le Fofoga Fetalai, e leai e le o se faifeau Savaii, o le faifeau i se mea o i. Ae o le agaga lena o le....

FOFOGA FETALAI: Malie le sui usufono se i tulai mai le Afioga i le Palemia.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, ou te vaai atu pei o lea e faasino le lima o le alii lea i le itu atu lea i Sasae. O le mea ia manatua, o nuu uma lava, e i ai lava eleele ua to faapitoa mo faafeagaiga, e faaigoa o le Sosaiete. O eleele la na o lea e galulue ai faifeau e masani ona faaoga i ai autalavou e galulue ma faataitai i le nuu le tulaga o le ola le faalagolago. E taua tele la le mea lea na saunoa i ai le Minisita mo Faatoaga, o le mea lena o lea tatou te taumafai e uunai, aua le ola faalagolago tagata ae taumafai e galulue. Ia o lea le mea lea ua tupu nei? O lea ua tau sue ni talo, ua tau sue ni talo e tau ave i Niu Sila. E tasi lava le matala maiga o le maketi, ae tau sue ni talo e ave i Niu Sila. O le tulaga la lena, o lona uiga, mo le isi 12 masina, atonu o le a toe ola mai faatoaga ia ona ua talitonuina tagata i le uunai uunai atu e le tatou Matagaluega o Faatoaga e toto toto toto le laueeleele, a o lea ua maua mai faamanuiaga ae ua le mafai ona tatou sapalaia le maketi. Ia o se fuafuaga lelei, ae tuu ia lea mea o lou faitio i faifeau.

FOFOGA FETALAI: Tulai mai le sui usufono e faaiu mai le saunoaga ua maea lou taimi.

Susuga PAPALII LIO FAAVAIVAIOMANU TAEU MASIPAU: Faafetai. E faamalulu atu i faaseseina le faafofoga mai a le aufaigaluega, e leai e le o se faaleaga, a o se mea ina ia... o se ata faataitai aua le tatou lumanai ina ia le aufaifaatoaga, leaga e mafua lau faamatalaga lau Afioga i le Fofoga Fetalai, masalo po o le 70% o le atunuu o lo o faalagolago i faatoaga talo, aemaise lava faatoaga talo. E pei o le agaga lena o lea e vaavaai i ai, ne i meaane, leaga o lea ua tatala le avanoa i e tele tupe ma tele seleni, o lea foi o le a faaoga fanua o le Malo. O le ala lena o le manatu, e omai nei latou e tele tupe faatoa, maua avanoa, fao maketi, e pei o mea faapena. Ae pei o le uiga lena o le agaga, ae ou te faafetai i le Afioga i le Minisita mo Faatoaga mo tatou faatoaga. E sao i le taimi lenei, ua aoga foi le soti o talo o la e foi ua toe galulue tagata i le taimi lenei, a o lou popolega mo le lumanai pe a taunuu le Tulafono Tau Faaofi lenei.

Lau Afioga i le Fofoga Fetalai, ia manuia le tatou Fono. Faafetai.

FOFOGA FETALAI: Malo faafetai. Faafetai atu i le saunoaga matagofie a lau Afioga i le sui usufono. E manatu o le taotoga tonu lea e tatau ona i ai tatou felafolafoaiga i lenei mataupu. O lea foi tou te maitau mai, a sau lava la outou fautuaga e le tulai atu le Malo, o lona uiga, point taken. Ae a sau foi i le tulaga o le uiga o le fautuaga e tuuina mai e tatau ona tali atu ma faamalalamalama ina ia faasao le mataupu, e faapena ona avatu le avanoa i le Malo e faamalalamalama ai, ona taatia ai lea i lagotonu mataupu uma o lenei Tulafono Tau Faaofi.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

Ma e manatu o le auga autu lena o le tatou Fono lenei, ina ia aumai la outou fautuaga i le Malo faafofoga atu foi, o le ala foi lea o lea tou te faafofoga mai o lea e fesili atu, aumai ni auala, aumai fautuaga ona faataatia lea, see atu i tatou Komiti, a ua mama le galuega mo le faamalamalamaina ma le faataatiaga o le Tulafono Tau Faaofi i le mea e tatau ona i ai.

O avanoa se isi sui usufono e toe fia saunoa?

Ia se i tuu atu le avanoa i le Afioga i le Minisita e ona le Tulafono Tau Faaofi.

Tofa Hon Fonotoe Nuafesili Pierre Lauofo: Lau Afioga i le Fofoga Fetalai, e faamalulu atu, na o si vaega lava lea na saunoa mulimuli i ai le sui usufono e lelei lava le toe faamanino atu, ina ne i taitaiseseina ai le faafofoga foi a le aufaifaatoaga. O ituaiga pisinisi nei e aumai i le polokalame lenei, mo le processing of agricultural products. O lona uiga o le gaosiga o ni oloa e faaoga i ai fua o tatou faaeleeleaga, e pei la o fale foi gaosi oloa ona tuuapa lea o mea o tulaga faapea, ia faavela po o a uma, ia saunia lelei, po o ni tagapepa e tuupepa pe tuuapa ona faatau lea i maketi i fafo. O le mea tonu lena o lea e agai i ai le Tulafono Tau Faaofi lenei. Ia manatua la na o tagata po o kamupani tetele e tai fia miliona e mafai ona omai e faatu mea o processing plants faapena, ae leai se miliona o le lalolagi e fealuai fealuai fai mai e sau e fai sona maumaga i Samoa, ae aumai e faatau i le maketi. E le tupu lena mea faapena. E pei la o le tulaga lea lau Afioga i le Fofoga Fetalai, o le processing o mea o agricultural.

FOFOGA FETALAI: Ia, tulai maia le sui usufono...

Susuga Papalii Lio Faavaivaiomanu Taeu Masipau: Ia leaga o lea ua afea mai lou... Leai o lea ua manino, a tuu la i ai ma sina vaega foi lea o le Tulafono Tau Faaofi, o outou la na e omai e fai mea ia, aua ne i faia ni tou maumaga i totonu o Samoa, ona uma lava lea, manaia ma manino mea uma. Ma lou faaaloalo lau Afioga.

FOFOGA FETALAI: O lea ua malamalama le.... Tulai mai le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e pei ona silafia o le agaga tonu lena o lea sa faatu ai le tatou SROS, fale suesue, e agai tonu lava i mea ia lea sa saunoa atu ai le Sui Palemia. Ma e pei ona silafia o la e ua i ai mea ua mafai ona maua, ua i ai tatou falaoamata, ua i ai suauu ua gaosi e mafai ona kuka ai meaai e gaosi mai le avoka. E i ai isi mea la e tapena i le taimi lenei. E pei la o nai mea ia, o lea e faatali nei ni tagata e i ai ni tupe e mafai ona latou gaosia i le tele e mafai ai ona faaoga ma avatu loa i fafo.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

O le vaivaiga lena o lea e i ai i totonu o le tatou atunuu, e le tele ni faipisinisi e lava ni a latou seleni, e mafai ai ona aumai ni masini tetele e gaosi ai mea ia o oloa e ave i le tulagalua. O lona uiga o oloa e ave mata i fafo le tulaga muamua. O le faafitauli tele e feagai ma i tatou i le mea lena, e taofiofia a tatou oloa i luga o tulafono tau quarantine. Na pau lava la le auala e mafai ona alofia e tatou mo Tulafono na o le alu loa i le tulaga lua o oloa tuuapa i Samoa nei, pe tuu fagu. O le ala lena na ala ai ona faatu le tatou Faalapotopotoga Suesue lea o le vaai mamao a le Malo i le agai atu i le lumanai ma maua ni ituaiga faipisinisi tetele faapenei e lava le tupe, lava le iloa o maketi, lava le lototele e fai ai. E le o maua le mea lena i tatou aufaipisinisi laiti o lo o i ai e le lava seleni.

Lau Afioga i le Fofoga Fetalai, o le toe faapoopo atu lena e faalatele le mataupu.

FOFOGA FETALAI: Malo faafetai. Ia, o se isi sui usufono e fia saunoa i le tatou Tulafono Tau Faaofi?

Ia, tulai mai le Tofa ia Lefau ona faaiu mai loa lea e Palusalua, le Afioga i le Taitai o le Itu Agai.

Afioga Hon Palusalua Faapo II: Leai, lau Afioga na o se mea e fesoasoani ai, e felafolai le tatou galuega, o lea ua uma atu lena Itu, ia lafo atu i lena Itu.

FOFOGA FETALAI: E leai, o le mea lea e avatu atoa lava o ai lava le sui usufono, e le faatauanauina, o ai lava e fia saunoa, o lea e lafo atu.

O lea ua fai lau faaiuga e uma loa Lefau o Oe, uma loa le tatou mataupu. Ia, tulai mai... O le a ea la le mea e faatutugata ai outou i le taeao o lea e fai atu tou te saunoa mai.

Ia, o le a toe tatala lou taofi. Soia ia tou te... Tulai maia lau Tofa Lefau ona faasolo ai lea.

Tofa LEFAU HARRY SCHUSTER (Vaimauga Sisifo): Faafetai tele lau Afioga i le Fofoga Fetalai mo le avanoa. E i ai le pese foi lea a le Ekalesia EFKS lea faapea, Lo ta nuu, ae i ai le isi pese ta te usuina foi e faauma ai se mafutaga o se mea taua ia tatou, Lo'u nuu e, o Samoa, e itiiti oe ma faatauvaa, ae mamalu oe o le Atua lava, o se tasi o pese e taua ia tatou.

Lau Afioga i le Fofoga Fetalai, i lau vaai a au ia i le tatou atunuu o Samoa, e i ai lava mea e patino ia tatou ia e ese mai a tatou i isi tagata uma o le lalolagi, o le tulaga lea e fanau mai loa le Samoa, e i ai le eleele e i ai le nuu e faasino i ai oe. O le vaai a le palagi e faatau le fanua, that land belongs you, a o le vaai a tatou o Samoa, e te le own ina se fanua e own e le fanua oe, e i ai le aiga e te faasino i ai, e te sau ai, e i ai foi le matai po o igoa matai e faasino i ai lou tagata. Ma o mea ia e taua ma auro ia tatou o tagata Samoa.

18 FEPUARI 2015

**Tulafono Tau Faaofi o Tulaga Tagatanuu i le Teufaafaigaluegaina o
Tupe Mai Fafu 2014 – felafolafoaiga i luga o le faitauga faalua**

Ia au lava ia isi ou manatu vaivai, o le isi la auro lea tatou te talanoaina i le aso lenei, o le faataua ma le faamamafa e tatou te avea la i le mea lea o le tagatanuu Samoa, aua na o le pau lava lenei o le atunuu e tatou te Samoa, e moni o le atunuu la e i isi atunuu i o, a o la ua nonofo i atunuu la o tulafono a atunuu la, ae na o Samoa lava nei mo tatou, o le tatou Tofi foi lea mai le Atua pei o le tatou talitonuga. Ia au la i lenei taeao lau Afioga i le Fofoga Fetalai, o se tasi o sui usufono mo Vaimauga Sisifo, o se fiafiaga foi ia te au le maua o lenei avanoa i le malae lenei o Tiafau e tu i totonu o le Vaimauga e talanoaina ai se mataupu aupito i taua ia tatou ma lo tatou olaga, e mai lava i le taimi o Siamani e tatou te talitonu i le tatou Saolotoga, e tatou te talitonu, e le pule se isi ia tatou, e pule lava Samoa, e oo lava i le taimi o lea ua tatou Tutoatasi ma le taimi lenei, o lea ua talanoa o tatou mai se atunuu laitiiti ma faatauva, po o le a le faataua tou te ave i le tulaga lea o le sitiseni po o le tagatanuu Samoa.

Sa fola manino e le Afioga i le Sui Palemia le tulaga o le tagatanuu Samoa i le Tulafono, ma e leai se mea ou te tetee i lona finagalo na faaali aua o le Tulafono, a o lau vaai lea i ai i le Tulafono. E na o le tasi lava le tagata e ave sao i ai i le Tulafono ma faaee i ai le Papa lea o le tagatanuu o Samoa, o le tagata e fanau i totonu o Samoa, a o se tasi o ona matua o le tagatanuu foi o Samoa na fanau i totonu o Samoa, ia e otometi lava le sitiseni o le tagata lena. O le isi tagata e mafai ona sitiseni Samoa, o le tagata na fanau i fafo a o se tasi o ona matua na fanau mai Samoa, e sitiseni foi la le tagata lea. A faapea la o oe na e fanau i fafo ae leai se isi o ou matua na fanau i Samoa, a o se tasi o laua o Samoa, e le maua la sau sitiseni Samoa e tataua la ona e sau e te nofo i Samoa i le tolu tausaga, faatoa mafai ona e sitiseni Samoa, a o oe o le toto ma le aano Samoa. I mea uma e pei ona ou taua muamua, e i ai le aiga e te faasino i ai, e i ai le matai e te alu i ai, e i ai lou nuu, ae a faapea la ua lua tupuaga na e fanau i Niu Sila po o Ausetalia, e te toe foi mai la i Samoa e te nofo ai mo le tolu tausaga faatoa mafai lea ona e sitiseni.

O le isi tulaga o le tagata foi lea ua fia nofo i Samoa, e lima la tausaga e talosaga ai ma nofo ai i Samoa, faatoa mafai foi lea ona sitiseni. O le isi tulaga o le tagata e faaiipoipo i le Samoa ma ua lima tausaga talu ona nonofo faatasi ma o lea la ua talosaga e lima tausaga e fai ai le talosaga, a o lea la ua omai nonofo i totonu o Samoa, ma e i ai le faamoemoega e faaauau le nofo i totonu o Samoa.

O tulaga la ia e avea ma isi tagata o tagatanuu o Samoa. A tagai i tulaga ia, e manino lava i vaega ia e fa, e i ai le piitaga ia Samoa, e i ai lou piitaga i le taimi ua tea, le piitaga la lea e te fanau mai o lou tina ma lou tama o le Samoa e te fanau i Samoa, e i ai lou piitaga i le taimi lenei, o lea e te nofo i totonu o Samoa ma e talosaga e te fia sitiseni Samoa. A faapea o oe e le o se tagata Samoa a o lea e te faaiipoipo i le Samoa, ia o lou piitaga lena o le tagata Samoa lea e te faaiipoipo i ai. Po o se tagata ese foi a a o lea e te fia nofo i Samoa, ae i ai ou naunauga e te fia sitiseni Samoa, o lea la ua e sau talosaga i le pemita e lima tausaga ma e nofomau i Samoa, o i ina la e te maua ai le agavaa e mafai ona avea oe ma sitiseni Samoa.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

I lau vaai la i le Tulafono lea e manino i lou mafaufau ia le faataatiaga o le Tulafono i le autu o le Tulafono i le faatosina mai ia le au maumea mai fafo e omai e faaoga a latou tupe mo atinae tetele ia na faataatia e le Malo, e manino foi le faataatiaga e pei ona folasia e le Afioga i le Sui Palemia, i tuutuuga ia e tolu tausaga e faia suesuega i le tagata lea. Na pau lea o lau vaai i le Tulafono lea i le faaipepe talafeagai i lau vaai, i le tolu tausaga lea e suesue ai le tagata lea, na o le 15 aso o tausaga taitasi e i ai i totonu o Samoa, ae le pei la isi tagata ia na ou fai atu i le Tulafono la lea sitiseni e tolu tausaga, tatou fua la i le tagata lea e i ai le piitaga o le toto Samoa, ae o le grandchild a tagata foi lea na fanau i Samoa na ou taua, e le otometi lou sitiseni e te sau ai e te nofo i Samoa mo le tolu tausaga, faatoa mafai lea ona e sitiseni Samoa. Ua faigofie atu la i le tagata lea ona tele ana tupe ona sitiseni Samoa ae faigata mo le tagata Samoa e i ai le piitaga o le toto Samoa, o lau vaai lena i ai i le Tulafono lea. Pei ona taua ou te le faitio i le Tulafono, o lau foi finauga e le o se finauga faapea pe sao pe sese, i lau vaai i le finauga o le finauga o le mafaufau, e manino lava le Tulafono ma le manaoga o le Tulafono, e manino foi le faataatiaga o le mea e sitiseni ai le tagata ia.

O le finauga i lou mafaufau, pe sili atu lou vaai faale-mafaufau i le Tulafono i le atinae lea e taumafai i ai le Malo, pe sili atu le mea lea e i ai lou loto. O lau tala sao lau Afioga i le Fofoga Fetalai, e fua lou loto, e fua lou loto i le Tulafono ou te malamalama i le Tulafono ma le mea e manao ai, ae fua lou loto aua o au o le Samoa, e fua la i tulaga nei. E manaia le tulaga foi lea faapea e faatosina mai tupe, ae i lau la vaai, o le omai o tagata ia mai fafo, o le a aveesea foi la avanoa mai i a tatou tagata. I Niu Sila ma Ausetalia i le taimi lenei po o le lima tausaga ua tea atu, o le tele ia o faitioga a tagatanuu lava ia o Niu Sila ma Ausetalia faapea, talu ona omai ia tagata mai Asia, o le matua taugata lava o latou fale, o fanua, o pisinisi, ua le mafai e tagata Niu Sila ma Ausetalia ona tauva i tauvaga i mea ia. I Farani i le tausaga lea na tea nei ia Novema i le issue o le Time Magazine i le vaiaso lona lua o Novema, sa sau ai le faitioga a le au toto vine i Farani ma le auvaega e gaosia le uaina, ma e tatou te silafia uma a oo loa i mea ia tau uaina, e le tulua le fai uaina a le au Farani i se atunuu o le lalolagi lenei.

O le faitioga a le au toto vine ma le au fai uaina a Farani, ua 600% le siitia o le manaomia o le uaina i le lalolagi atoa faapea Farani i Asia aemaise lava la Saina. O le mea la lea ua tupu, ua omai kamupani ia mai Asia ma Saina, ua faatau ia togavine ia i totonu o Farani ma fale ia e fai ai le uaina, ua le mafai e tagata Farani ona tauva i le uaina. Ae a tatou vaai foi ia Farani ma le latou foi aganuu, o se tasi lea o se mea taulia tele i le au Farani, pei o se national tradition a Farani le uaina aua o le atunuu lea na matua matautia lo latou faiga o le uaina lea e oo mai i le taimi lenei. O lau vaai lea i ai lau Afioga, a faapea e omai le au maumea lea mai fafo e tele atu a latou tupe, o le a ave muamua la le avanoa lea i galuega tetele ia ia latou, atonu foi o lenei Tulafono pei ona aumai e le Malo, o se fafagu foi lea i a tatou tagata faipisinisi ma aiga faipisinisi i nei.

18 FEPUARI 2015

**Tulafono Tau Faaofi o Tulaga Tagatanuu i le Teufaafalugaina o
Tupe Mai Fafu 2014 – felafolafoaiga i luga o le faitauga faalua**

E i ai lou talitonuga ua i ai aiga ma kamupani faipisinisi i Samoa ua oo le ituaiga tupe ia ua latou maua ua mafai ai ona fai galuega ia a le Malo, o lau tala la mo outou, a outou manao i le avanoa omai e fao, aua le avea fua i tagata ia mai fafo, omai e fao le avanoa lea, omai e faaalu a outou tupe i galuega tetele ia a le Malo, e sili atu le tou faia o le mea lena, ae iloa mulimuli ane po o le a le mea e tupu i le Tulafono lea, ae tou fai mai foi ia matou, o lena ua outou avea ia avanoa i tagata ia mai fafo ae le muamua matou, o lau fautuaga la lena i le aufaipisinisi lea a tatou, a faapea o avanoa ia o lea e tau avatu i tagata ia i fafo e aumai ai tupe e fai ai, ma ou te vaai foi i le mea lea e tau fai ai le Malo ia omai tagata e aumai tupe ia, o le a faasaoina foi isi tupe e fai ai isi atinae a le tatou Malo aua o le Malo uma o tatou, ae ia au lava ia, e fua lava lou lotou ou te manao e faamuamua tatou o tagata Samoa. O le faaupuga lea o Samoa mo Samoa, na tatou ola mai lava o le tatou talitonuga lava lea, o Samoa mo Samoa, tatou finau mai i le taimi o le Taua e oo mai i le Saolotoga lena, e oo i le taimi lena i totonu o le UN ua tatou faafofoga na saunoa le Afioga i le Palemia i ina, Forum Commonwealth, na saunoa malosi lava lo tatou Taitai mo tatou o Samoa ma mea e manao ai tatou o Samoa, o le tatou olaga lena o lea e i ai ó ma o le talitonuga foi lena e i ai e talitonu lava tatou i o tatou tagata ma le mea e tatou te mafaia, e le o se talitonuga fou. O le igoa foi lea o le tusi a le Polofesa lea o Davidson sa avea ma Faufautua i le taimi o tau fai le Faavae o Samoa ma le taumafaiga o tatou e Tutoatasi, e i ai lana Tusi lea o Samoa mo Samoa.ö

A outou tagai i le amataga o le tusi lea, o la e tau mai ai e Davidson se faatasiga na oo mai ai ia Sir Peter Barter o se alii Polofesa i le Anthen Polity e i ai lona pito Maori, ia ona sau lea o Sir Peter fai mai, o tatou ia Polenisia o tatou na tatou folau mai i Asia ia tatou omai ai lea o isi i Tonga o isi i Fiti, o atu Niu Sila ae omai iinei Samoa, e molimau ia Sir Davidson fai mai e tulai ae i luga ia le isi tulafale Samoa fai mai, e sao lelei lava oe ia Sir Peter Barter, o le isi vaega uma lava na Polesinia na omai ma le map fai mai, o matou nei o Samoa na matou fananau lava matou iinei.

O lou lava la talitonuga, o Samoa lava ia e mo tatou, ma o lau tali i ai, e fua lou lotou ou te le manao ma te tutusa ma seí po o le a le tele o tupe a le faipisinisi lea e sau mai fafo, o lau faamasino, e le o lou mafaufau a o lou fatu, e tutusa lou alofa ia Samoa pei o lou alofa ia Samoa, e tutusa lou naunau ia Samoa, e pei o lou naunau ia Samoa ma tagata e fananau mai ia te au, a oo lava la í .a omai nei la o le mea lea o le tagatanuu, o mea ia e te maua pe a tagatanuu Samoa, e te palota, seiloga ua e faia se solitulafono e faasala ai oe e te falepuipui, ona aveese lea e te le palota i ai i le taimi lea e te falepuipui ai, e mafai lea ona e alu i le palota, e mafai ona e faataua se fanua Samoa pe a e manao i ai, e puipui oe e Samoa, po o le a le mea e tupu ia oe i fafo, e puipui oe e Samoa i le Tulafono, e o atu tagata o le tatou Embassy e vaai oe pe a i ai se mea e tupu ia oe, tatou te le oo i lena tulaga ae ua lua taua o le lalolagi ua oo ai Samoa, e i ai tagata i luga o le uati ma le maa lea e i tai i Mulinuu, la e tusi ai Samoa na o i le Taua lea.

18 FEPUARI 2015

**Tulafono Tau Faaofi o Tulaga Tagatanuu i le Teufaafalua o
Tupe Mai Fafu 2014 – felafolafoaiga i luga o le faitauga faalua**

O le fesili la mo oe, atonu tatou te le oo i ai i le tagata lea e sau ma ana tupe ia e tele, a oo i le taimi e moomia ai e Samoa lou ola e puipui ai Samoa, e te oso i totonu pe te faapea, ðOi, o lou sitiseni lea na tou aumaia lea na faatau, malie e toe avatu se i ou toe alu au i le mea na ou sau ai, ou te le fia oti i se taua e aafia ai Samoa. Ma lou faaaloalo tele lau Afioga i le Fofoga Fetalai, faafetai mo le avanoa.

FOFOGA FETALAI: Malo saunoa i lau Afioga i le sui usufono mo le Vaimauga Sisifo, Tofa Lefau Harry Schuster.

Ia tulai mai lau Afioga i le Sui Palemia.

Tofa Hon Fonotoe Nuafesili Pierre Laufofo: Lau Afioga i le Fofoga Fetalai, e taua tele le isi vaega o le saunoaga a le Tootoo na faamaui atu nei, e sao lelei mo le tulaga lea o pisinisi, a o se fagufagu foi mo tatou tagata faipisinisi i Samoa, ina ia siitia le lelei o le tulaga e i ai a latou oloa, siitia i luga, aua o le mea la lea e maua. E pei lava e faamatala soo ma talanoa soo ai, mo faiga faatauva i pisinisi, o mea masani i totonu o maketi lea e saunoa soo i ai le Afioga i le Palemia, faiga faatauva, fai faiga faatauva e siitia ai le tulaga o oloa mo auunaga, aua a tele ma malosia tauvaga, ona pau ifo foi lea o le tau. E taua tele, o le tulaga lena o lea e tatau ona tatou tilotilo pea i ai i le vaega lea. O le mafuaaga lena o lea e lagolago ai e le tatou Malo faiga ia, o faiga lelei mo tagata uma, tagata lautele o le atunuu. Ioe, e faapena le tulaga e i ai. Na pau lava le mea ia silafia, o tausaga taitasi, masalo o la e silasila lava i nusipepa e fai ma faasalalau avanoa foi nei nofomau i totonu o le tatou atunuu.

O le isi avanoa faasalalau pe 15 ea avanoa, e maua la nofomau ia tai lima tausaga, e i ai foi aiaiga ma tuutuuga, e i ai foi agavaa e tatau ona ausia ma faamalieina le tatou Malo. O le tasi lena auala e omai ai i totonu, e le faapea na o le pau lea o vaega lea e tau atu ai, a o vaega ia pei ona saunoa i ai le sui usufono mamalu, pei ona silafia foi, e 15 aso o le tausaga, e pei lava ona avatu, o sailiiliga ia ma suesuega ua oo i ai suesuega a le tatou Komiti Faapitoa foi lea o Tapenaga, o le tagata faapenei e le umi lona nofo i se atunuu e tasi ona e i ai foi a latou investment i isi atunuu, ma e faapena ona feoi, feoi asiasi i i, e i ai foi isi o latou lala i Niu Sila, po o Amerika, po o Ausetalia po o Asia po o fea lava, e le tumau i se aso se tasi. Ia pei la o lea na ou avatu, ua 22 tausaga o iinei le Yazaki, e na o le faatasi lava ona oo mai le tamaloa Yazaki i Samoa. Silasila la i ai i le tulaga lea? E faapena tagata faapenei, ona e naunau foi lea e asiasi i a latou lala o pisinisi, e le na o le tasi se atunuu e i ai. Afai foi o la e fai i isi atunuu polokalame faapea, ia ae faapea na o Samoa la e omai ai tagata ia? Ioe. A maua se tatou tasi, lua, tolu i nai tausaga ia e lumanai atu, manaia, e faapoopo ia galuega. O fea a o i ai le fanau aoga? Ta te le i maua se fuainumera lata mai nei o le tausaga lea na tea, masalo o le Minisita mo Aoga e na te silafia fanau foi nei e faaiuina mai aoga maualuluga ma lunivesite e fia maua ni galuega e galulue ai, e maua ai tupe e tausi ai aiga. Ioe.

18 FEPUARI 2015

Tulafono Tau Faaofi o Tulaga Tagatanuu i le Teufaafalaluegaina o Tupe Mai Fafu 2014 – felafolafoaiga i luga o le faitauga faalua

Tofa Lealailepule Rimoni Aiafi: Lau Afioga i le Fofoga Fetalai, o se mea e fia faasao faamolemole....

Tofa Hon Fonotoe Nuafesili Pierre Lauofo: O taumafaiga uma la ia ma le anoano o isi mau polokalame atinae a le Malo o lo o taumafai i ai tatou i le tulaga lea.

FOFOGA FETALAI: O lea o le a uma ona tuu atu lea.

Tofa Lealailepule Rimoni Aiafi: Ou te le fia lauga, a o le mea e fia faasao lau Afioga.

FOFOGA FETALAI: O le a se mea e fia faasao Lealailepule?

Tofa Lealailepule Rimoni Aiafi: O lea ua faafa pe faalima ona toe lauga lava le Afioga i le Sui Palemia e faamalamalama le mea o lea ua matou iloa. Ma le faaaloalo lava, ae tuu mai se avanoa se i avatu se matou....

FOFOGA FETALAI: Malie o lea ou te lelei, o lea ua maua lou finagalo. Ae pei ona ou taumafai atu i le taimi ua sola, ave pea le avanoa o lea e... vaai foi e le i faalavelave lava le Malo i le saunoaga a Lefau, o lea la e ave le Tali a le Malo e uiga i le faamalamalama na tuuina mai.

Ua tatou taunuu i le tatou taimi malolo, o le a faataatia ese Taulumaga a le Fono Aoa mo lana malologa masani o le taeao.

Na faataatia ese Taulumaga a le Fono Aoa mo lana malologa masani i le itula e 10:45 i le taeao ma toe faaauau i le itula e 11:24 i le taeao.

FOFOGA FETALAI: E faasilasila atu ua toe amataina nei Taulumaga a le Fono Aoa Faitulafono.

E faamalo atu le onosai i lenei vaega o le taeao, o lea ua tatou taunuu mai i lenei vaega lona lua o le tatou Fono, malo onosai. E manatu foi ua maua la outou faatiliga malosi e ala i le tauteaga ma le tausiga i le taumafai atu a le Failautusi o le Fono ina ia maua pea le malosi i le tino, le agaga aemaise le faasologa o le tatou galuega.

E faamalo foi le onosai i le tulaga o le tatou Maota nei, e manatu o lea ua taatia i lagatonu tulaga o le tatou Fonotaga pei ona faatalauala atu ai i le taimi ua sola.

E faia le tatou malologa ua maea ona saunoa le sui usufono mo Vaimauga Sisifo, Tofa Lefau Harry Schuster. O lea ua avanoa le tatou Maota mo se isi sui usufono e toe fia saunoa i le tatou Tulafono Tau Faaofi.

Ia, tulai mai le sui usufono mo Faasaleleaga Nu.1, Afioga Hon Gatoloaifaana Amataga Alesana Gidlow.

18 FEPUARI 2015

Tulafono Tau Faaofi o Tulaga Tagatanuu i le Teufaafalugaina o Tupe Mai Fafu 2014 – felafolafoga i luga o le faitauga faalua

Afioga Hon GATOLOAIFAANA AMATAGA ALESANA GIDLOW (Faasaleleaga Nu.1): Faafetai i lau Afioga i le Fofoga Fetalai. E le afaina a e taua foi lava o au o le sui usufono mo Faasaleleaga Nu.3, e faapena lava le nofo fealofani o le Faasaleleaga. Ae ou te faamalo atu i leni taeao, ma e faatalofa atu i le mamalu o le tatou Palemene i le afio o le Afioga i le Fofoga Fetalai, Afioga i le Palemia ma le Kapeneta tainane foi Minisita Lagolago. I le afio foi o lau Afioga i le Taitai o le Itu Agai ma le Sui Taitai, ae tainane foi le mamalu o lena Itu o le tatou Palemene. Ae tainane foi le faafogafoga a Ofisa Sili o Pulega ma Pule Sili, le Failautusi o le tatou Palemene ma le tatou aufaigaluega o lo o lima ma vae i ai le galuega nei.

E faatalofa atu foi i le faafogafoga mai a Samoa mai ona tumutumu seia oo lava i se ua itiiti. Faafetai lau Afioga i le Fofoga Fetalai mo le avanoa, ou te lagona e muamua lava ona fia avatu le agaga faafetai i le Malo i leni Tulafono Tau Faaofi, aua o se Tulafono Tau Faaofi ua toe fagufagu ai ma toe aumaia i luga manatu o tagatanuu o Samoa i o latou tofi na aumai e le Atua, aua o le tagata ma lona faasinomaga, o le tagata ma lona siosiomaga. Ou te talitonu foi la, e leai lava se isi atunuu ou te taua o sou siosiomaga ma sou faasinomaga, na o Samoa lava. O lea ou te faafetai ai i leni Tulafono Tau Faaofi ua toe faamanatu mai ai ia te au, aua ne i ou faatamala i lou tofi na aumai e le Atua.

Ou te faafetai foi i le Malo aua ua ala ma ii leni Tulafono Tau Faaofi le silafia o le tatou atunuu, le silafia e le Palemene o le mataala ma le taumafai punouai o le tatou Malo e saili atinae eseese ma auala eseese e mafai ai ona atiae le tatou atunuu. E avatu ai lou agaga faafetai i ia vaega o le tulai mai ai o le tatou Tulafono Tau Faaofi. Ae peitai ou te lagona lau Afioga i le Fofoga Fetalai, o le agaga lava ia o Tulafono taitasi ma le agaga foi o le tatou i ai i totonu o le Palemene e avea ai tatou ma sui usufono o itumalo taitasi ina ia mafai ona tatou lafo aso ma tatou tuualalo i ni Tulafono foi e faufau ai le lumanai o Samoa. O le galuega lena a le sui usufono taitoatasi pei ona tofia ai tatou ma filifilia ai tatou e tatou itumalo o lo o tatou aeae ma tatou saofafai ai i le Palemene i leni foi vaiata.

O le auala lena lau Afioga i le Fofoga Fetalai e fia avatu ai nai tuualalo e tusa ai ma le Tulafono Tau Faaofi ina ia i ai lava se sao e fesoasoani atu ai pe tuualalo atu ai, aua o le upu lava ia faa-Samoa, ðO le tele o popo e sua ai le lolo.ð E le gata i lena, afai foi ua sala uta, ia tonu tai. O le auala lena o le tuualalo ma le fesoasoani atu.

O le agaga lau Afioga i le Fofoga Fetalai ou te fia talanoa ai i le Tulafono Tau Faaofi leni, o nai popolega ma ni nai vaivaiga i le vaavaai atu i le Tulafono Tau Faaofi, ua aia tutusa le tagata Samoa ma le tagata o lea o le a mafai ona saofaga e ala i le Tulafono Tau Faaofi leni, aua foi la lea o le sitiseni lava o le tagatanuu lava, o le tagatanuu. E le mafai ona tatou toe faasinolinolima pe faese aua e faailoa ai loa lo tatou faailoga lanu. O mea uma lava na o lo o tatou agavaa nei i ai, o tatou eleele, taatia la eleele faaleaganuu, a o eleele tuusaoloto.

18 FEPUARI 2015

Tulafono Tau Faaofi o Tulaga Tagatanuu i le Teufaafalaluegaina o Tupe Mai Fafu 2014 – felafolafoaiga i luga o le faitauga faalua

O Samoa o se tamai atunuu na o le 1000 sikuea maila le tele o Samoa. O lo o tutupu a tatou tupulaga, laitiiti, po o le 10% po o le a i le faalogologo atu i eleele tumaoti, lea lava e oo mai i le taimi lenei ua tau faasoa, e tele le mananao, aemaise lava alaafaga mai tua ma Savaii, tau saili ni auala e taufai omai uma i le taulaga o lo o taulai i ai faamanuiaga ma atinae. O avanoa na o lo o i ai le popolega lau Afioga i le Fofoga Fetalai, aua a sau nei le sitiseni lea le mauoloa, e faigofie ona ia faatauina o tatou fanua tumaoti. E toe tulai mai a tatou fanau, lua pe tolu tupulaga lumanai po o a taeao foi lava, ua leai ni avanoa e mafai ona omai ai i totonu o le taulaga, fanua tulalata e mafai ona latou nonofo ma saoloto ai.

O lona lua o tulaga ia o pisinisi. Lau Afioga i le Fofoga Fetalai, ua vaavaai atu ma le manino i le tatou Tulafono Tau Faaofi, o lo o i ai lava tulaga o pisinisi foi ia o lo o mafai ona taofia tagatanuu o Samoa, e i ai le faleoloa, e i ai le taxi ma isi lava pisinisi ua le maua i lenei taimi. O tagatanuu, e saoloto, ua leai le reserve list lena e faataga uma mo le lava e mafai ona faatinoina.

Ia, o le Samoa, o lena ua outou tagai i ai, ua fai fai le faleoloa o le loomatua i tua, ia tau ia Savaii leaga o au ou te sau mai Savaii, ua fai fai ua leai se seleni ua tele mea faalenuu ma mea faalelotu, tapuni, alu alu ua maua mai ni tupe mai fanau i fafo, toe faasaga atu toe tatala. Ia, a mafai ai foi ona tautuaina le aiga, le nuu ma le lotu. O le aoga lena o le saoloto lea e i ai i mea e mafai ona tua i ai lo tatou lava tagatanuu.

Ua ou manatua ai lau Afioga i le Fofoga Fetalai, masalo o le vaitau o le 1980 i le taimi lava lena i le tauatiaeina o le aiga, sa ou faimalaga pea i Tutuila e ave nai fua o faaeleeleaga e faatau ai. Sa ou matauina, o le tele o faleoloa ou te ulufale i ai, e le faia e se Amerika Samoa, e faafocina e tagata mai fafo. Ona ou nofo lava lea ma ou mafaufau, na ou foi mai foi ma ou tautala ai i totonu lava o le matou aiga, talofa e, talofa e, talosia ae le oo Samoa i le tulaga o i ai nei Amerika Samoa i lena foi vaitau. Ou te lagona o tulaga lava na o lo o i ai nei. E vaavaai atu nei lau Afioga i le Fofoga Fetalai, ua amata ona alu ai Samoa i le tulaga lena. Ma o se popolega, o se vaivaiga, o se naunautaiga i lou tagata Samoa mo le lumanai o alo ma fanau. A maua le poto, ia i ai le avanoa e mafai ai ona fai e ia lana pisinisi, ae le o le avanoa e alu ai e faigaluega mo le tagata mai fafo.

O lo o i ai a tatou feagaiga faapitoa ma isi atunuu o lo o tatou vavalalata, o le popolega foi lena, e aia tutusa i ai o tatou tagatanuu, ne i alu alu ave lea ma ni avanoa e taofia ai o tatou avanoa i nei treaties po o feagaiga faapitoa o lo o mafai ona saofaga i ai Samoa ma manuia ai o tatou tagata pei ona outou silafia.

Ia, lau Afioga i le Fofoga Fetalai, ou te manatua foi se lagona o se tasi o mea sa faufautua ai e sa faufautuaina foi o tatou tama ma tuua sa fauina le Faavae o Samoa ia mafai ona tutoatasi. Ole fautuaga sa aumai, e tolu mea Samoa ia e uu i ou lima, aua e te faatamala ai. O le mea muamua, o lau gagana, lona lua, o lau aganuu. Tolu, o ou eleele.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

O mea na e tolu e ao lava ona tatou liolio ma tatou puipui i ai. E le mafai foi ona faatusatusaina i tatou i atunuu tetele e tele o latou eleele, tele o latou tamaoiga, pe itiiti ma faatauva Samoa, ae ou te lagona, e ala foi ona taua i e o lo o fia afifio ma omai tatou te galulue faatasi ona o lo o i ai se mea taua e mafai ona latou maua atu ai. Ia, ae pei o sou manatu faapito lau Afioga i le Fofoga Fetalai, ae ou te manatu lava, ia liolio mo si o tatou atunuu i nai o tatou eleele laiti tatou te puipui i ai mo a tatou fanau, i e lua, tumau lo latou tofi, lo tatou tofi mai le Atua e ao ona aua ne i tatou faatamala i ai lau Afioga i le Fofoga Fetalai, o le meaalofoa mai le Alii e le faaogaina, e aveeseina e le Atua. A tatou faatamala i o tatou tofi, ou te lagona e faapena.

E faaiu atu sau faamatalaga lau Afioga i le Fofoga Fetalai, e manatua se tala foi na ou faitau ai, tatou te saili uma lava i le Afioga a le Atua e aumai ai sina manatu. Ia, na ou tau atu i le tala lea ia Aapo ma Napota, manao Aapo i le tovine a si toaina o Napota, ave atu i ai le fia eleele e fesui ai, o le upu a Napota, òIa mamao ia Ieova ona ou avatu le tofi o ou tama ia te oe.ò Ma o le upu lena e fia faaiu atu ai sau tuualalo i le tatou Malo, Afioga i le Palemia i le Tulafono Tau Faaofi, se i tagai ane i ai, fefulisai se tofa ma se faautaga, aua lava lo tatou atunuu ma le lumanai mo a tatou fanau. Ia manuia le Fonotaga lau Afioga i le Fofoga Fetalai.

FOFOGA FETALAI: Malo saunoa. Ia, o le a lafo i lea Itu o le Maota. Tulai mai se tasi o sui usufono mo le Au Palota Taitoatasi, Susuga Hon Papaliitele Niko Lee Hang.

Susuga Hon PAPALIITELE NIKO LEE HANG (Palota Taitoatasi): Faafetai atu i lau Afioga i le Fofoga Fetalai mo le avanoa. E manatu foi e manaia le sosoo o maua aua e pupuu lava o ma manatu. Lau Afioga, e tulai atu ma le agaga faaaloalo e fia fai foi se manatu puupuu i lenei Tulafono Tau Faaofi e taua tele. E faatauaina e lou sui usufono lenei Tulafono Tau Faaofi e tusa ai ma ona sini autu e tolu lea sa taua i le saunoaga faamalamalama a le Afioga i le Sui Palemia e ou le Tulafono Tau Faaofi.

Muamua; faatupulaia o pisinisi tetele po o falefaigaluega i totonu o si o tatou atunuu. Lua, o ia falefaigaluega o le a create ai ni avanoa faigaluega mo alo ma fanau a si o tatou atunuu. Ma le tolu, o le a faatupulaia ai le tatou tamaoiga pe post ai le economic growth.

Lau Afioga i le Fofoga Fetalai, e taua tele la le faamoemoe o lenei Tulafono Tau Faaofi, ae faavae se manatu vaivai mai le Afioga Paia a le Atua mai le Tusi a Timoteo 1 Mataupu e 6 fuaiupu 10: òAua o le manao i tupe, o le pogai lea o mea leaga uma.ò Ia o le fetalaiga lea mai le Afioga a le Atua, e le o sau tala lau Afioga. O le mea moni lau Afioga i le Fofoga Fetalai, o si o tatou atunuu e faavae i le Atua, ae afai la o se avanoa lea o le a ofo mai ai ni tagata faatupu vevesi i totonu o Samoa aemaise ai o ni tagata e le kerisiano o latou talitonuga ona ou popole lea. Ua uma ona saunoa le Afioga i le Sui Palemia i le puipuiga o si o tatou atunuu i lea tulaga.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

Lau Afioga i le Fofoga Fetalai, o lea ua tupu mai Ausetalia tulaga ia, e le i mamao atu nei, ma o lou talitonuga e ono tutupu foi iinei i Samoa, i le avanoa lea e tuu i tagata nei e omai e invest ma maua o latou tagatanuu aua o le a tutusa uma aiatatau a le vaega lea e omai e invest ma faaaoga le tatou tagatanuu e tutusa ai aia ma o tatou tagata.

E pei o le tulaga lena i le popolega lea lau Afioga, ae ua uma ona saunoa le Afioga i le Sui Palemia, e silasila totoa i ai le Komiti ina ia aua ne i sao mai tulaga ia. Ma ona o lea ua tulai mai i Ausetalia, ia e le mamao lava tatou ma Ausetalia lau Afioga. O le popolega lea, ae o lena ua i ina le faimea i lau Afioga i le Sui Palemia...

FOFOGA FETALAI: Malie le sui usufono o lo o saunoa se i tuu atu le avanoa i le Afioga i le Sui Palemia.

Tofa Hon Fonotoe Nuafesili Pierre Lauofo: Lau Afioga i le Fofoga Fetalai, na ona faamanatu atu i le sui usufono mamalu o lo o saunoa, o le faalavelave lea na tupu mai Ausetalia, e le i faia e se tagata faipisinisi po o se tagata foi lea e fai ni ana kamupani po o se milionea Ausetalia. O le mea lea na faatupuina e se tagata na oo atu i Ausetalia, o se tagata sulufai, o se refugee. E le talia foi la ni tagata... o le polokalame lea pei ona faamalamalama atu, mo tagata faipisinisi tetele foi ia ae le faapea o se tatou polokalame e talia ai ni refugees e omai i Samoa.

FOFOGA FETALAI: Tulai mai le sui usufono...

Afioga Hon Palusalua Faapo II: Lau Afioga i le Fofoga Fetalai o se mea e fia faamalamalama.

FOFOGA FETALAI: E faamalamalama ia Papalii pe faamalamalama ia Fonotoe?

Afioga Hon Palusalua Faapo II: E faamalamalama ia laua uma.

FOFOGA FETALAI: Agai la ia Papalii lau faamalamalamaga.

Afioga Hon Palusalua Faapo II: Ioe, o le tagata lea na tupu ai le faalavelave, o le atalii o le milionea na auala mai tagata sulufai ia. E sao mai ai i ina, a o le tagata milionea ua maua lona sitiseni ona....

FOFOGA FETALAI: Malie lau Afioga i le Taitai o le Itu Agai....

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, e faigofie i Ausetalia aua e fiu e fesolafai, ae faigata tele iinei o si tamai motu. O lo o i ai i totonu o Samoa ua silia ma le sefulu tausaga le Ofisa Tutotonu o Leoleo faava o Malo lea e fesootai uma lava ma isi Ofisa o Leoleo faava o Malo, o lo o i ai uma lava faamatalaga o tagata faapea. E le i oo mai iinei a ua leva ona pue. O le mea foi lena e faigata ai ia i latou ona omai i ni atunuu faapea aua e faigata ona toe sosola, e faigofie lava ona maua, e pue lava i o i Ausetalia e le i omai pe pue atu foi i Niu Sila e le i oo mai iinei.

O le ala foi lena sa ou faamamaavega ai i tagata ia toeitiiti momole i le fefefe i mea nei o faamai e oo mai, aua o le tele lava o faamai, lea ua maua i Samoa. Aua o le tele lava o faamai lea ua maua i Samoa, se i vagana lava le faamai lea o le Ebola na fesiligia ai au. O lau tali, òE pue lava i Aferika tagata e le i oo mai. òAua le popole i na faamai, lea sa lauga ai Papalii, o le popole i aumai nei faama. O le mea ou te popole ai, ona o lea e talau mai talau mai talau mai talau mai mea o ituaiga mea o ituaiga faamatalaga faafefe tagata ina ia teena ai se Tulafono Tau Faaofi ua lava tapena, e tele lona aoga. Lau Afioga i le Fofoga Fetalai, o ituaiga taimi lava nei e suamalie aim ea faapea, o le faafefe tagata, ona teena ai lea o se mea lelei o lea e taumafai le Malo e fai.

Ia o lea la ua ou tau atua faamai. O le mea lea Papalii, aua e te popole, e le oo mai lava iinei na faamai. Afai foi e oo mai, e oo mai ua maua le fualaa. Ae a le maua foi se fualaa, o isi e launonu, launonu lava ma taape atu ai lava.

Afioga Hon Palusalue Faapo II: Lau Afioga i le Fofoga Fetalai o se mea e fia faasao ma fia faamalamalama, leaga o lea e saunoa le Palemia e taufaafefe, taufaafefe. O le aiatatau ma lou sitiseni lea e faalala mai o le a aveese, ave i isi tagata e le o ni Samoa. E le o se taufaafefe la, o le manumanu i lou aiatatau.

FOFOGA FETALAI: O lea o le a avatu le faamalamalama o le faasaoga o le mea lea....

Susuga Hon Tuilaepa Fatialofa Lupesoliai Aiono Neioti Sailele Malielegaoi: Lau Afioga i le Fofoga Fetalai, o le mea e fia faasao. E leai lava se isi o aveesea lou aiatatau o lou sitiseni. A o lena foi ua i ai lou sitiseni Ausetalia. E a la le mea, e manaia? Afai e manaia le lua ia te oe, e faigofie foi i le isi tagata aua lona uiga e tolu, o le sitiseni Samoa, sitiseni Niu Sila, sitiseni Ausetalia. A lea na tatou faalogo i le tala a le tagata fai news i Ausetalia, òA, se leaga le mea manaia, na ona fia oso lava i luga o le vaalele aumai le isi pepa malaga malaga ai. O le manaia ia o le tele o sitiseni. O au ia, na o le tasi lava le sitiseni o au, na o le tasi lava le sitiseni. Ae ou te musu e fesili atu ia Aeau pe fia ni ona sitiseni.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

FOFOGA FETALAI: Tulai mai Papalii ou te manatu ua manino lea mataupu.

Afioga Hon Palusalua Faapo II: Se o le mea leaga o la e faalogologo mai lou itumalo ma Samoa, e tasi lava lou sitiseni o lea e faaoga, o le sitiseni Samoa. O lou sitiseni la lea o lea ou te popole ai, sitiseni o lou itumalo, ioe. O lea o le a faatau.

Susuga Hon Tuilaepa Fatialofa Lupesoliai Aiono Neioti Sailele Malielegaoi: Ioe, a foi na o le tasi lava iinei, ae ua leva ona e mau i Ausetalia i lou sitiseni Ausetalia, a? E leai, leaga foi o le mea lena a tatou e faataga le tolu, fa, lima, ono, fitu, valu, iva, selau sitiseni? E le o taofia ona o le tulaga lena i o tatou tagata. Na pau lava le mea ua ou toe salamo ai nei, ua aveese atu ma au, ua ou nofo lava ma aveese atu ma au i le teuteuga o le Tulafono i aso ua mavae le avanoa e mafai ai ona ou faa-sitiseniina tama fanau a Samoa e moomia e omai e taaalo mo le Manu Samoa. O lea la ua toe omai nei, a o le a le tulaga o mea ia? O le mea la lena ua ou toe nofo ai nei ma ou mafaufau, sa tatau ona ou le aveesea atu ma au. O lea la ua ou toe mafaufau i ai i le anoano o tama fanau. Ua faatupu manatu mai ia te au Lefau, tama fanau nei e fananau i fafo, ae ua aveese atu i lalo o le tatou Tulafono, a o tagata e omai ma manumalo ai tatou i le Taitoafitu ma le basket ball.

Lau Afioga i le Fofoga Fetalai, e pei o si au faaopopo atu lena i lenei foi itula, se i toetiiti toe alu atu isi faasologa pulu.

FOFOGA FETALAI: Tulai mai Papalii, ou te manatu ua faatea lea fuilauvi.

Susuga Hon PAPALHITELE NIKO LEE HANG: Faafetai atu i lau Afioga. O lou manatu vaivai, ou te le i talanoa atu i ni milionea po o ni tagata faapena. Na pau lava le mea sa faauma atu ai lau faamatalaga i le vaega lea o tagata mai fafo atu o Ausetalia, e le o se taganuu o Ausetalia, pe na maua foi sona ia sitiseni i ituaiga auala ia. O le popolega lena, ae le faapea na ona avatu o nai manatu vaivai e toe silasila totoa i ai le Malo, pe lava puipuiga ia pe malupuipuia, ae a faapea e sao mai ai tulaga ia, aemaise ni talitonuga foi ia o Ekalesia e le kerisiano, e faigofie lava ona aafia ai le tatou atunuu e omai ma tupe faatau ai tagata ma mea faapena. Ia o popolega lava na lau Afioga, ua iloa foi e ono tutupu mea nei.

Sa afea foi i le saunoaga a le Sui Palemia le tulaga lea e faasea mai ai le mamalu o le atunuu ona o le manatu i le tulaga lea o le feafaatauaiga o le tatou sitiseni Samoa. O lea foi ua saunoa malamalama le Afioga i le Sui Palemia, ae ua ou manatu lava mo faamaumauga, e tatau pea ona faamau ai ni manatu foi o i matou nei ona o le Tulafono Tau Faaofi e taua ma le aafiaga o tatou tagatanuu i mea faapea. Ia, ae pei o le manatu o le au faasea lea na aumai, sa faapea ona ua avea le tatou sitiseni Samoa pei se incentive po o se maunu foi lele e ono omai ai tagata ona o lea e maua le sitiseni.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

O le tulaga lena, o lea ua saunoa manino le Afioga i le Sui Palemia i lea tulaga. Aua foi nei tatou naunau tele i le ia ae ia tatau foi ona tatou manumanu i le upega pei o lea faaupuga.

Lau Afioga i le Fofoga Fetalai, o le uiga o lea faamatalaga, aua nei tatou naunau tele i le tupe, e ui lava ina e moomia tele e tatou tupe e atiae ai si o tatou atunuu vaivai ae taua foi ona tatou tilotilo ma silasila totoa i ni aafiaga ogaoga e ono aafia ai lo tatou siosiomaga i ona eleele ma fanua o tatou faasinomaga ia, aemaise ai le tatou aganuu, le culture ma le tradition, aua lava le lumanai manuia o alo ma fanau fai mai a Samoa.

Lau Afioga i le Fofoga Fetalai ou te lagolagoina le sini autu o le Tulafono Tau Faaofi i le faatupulaia lea o fale faigaluega aua ni galuega mo alo ma fanau, a o le popolega lea pei ona ou faali atu, unforeseen circumstances lea sa ou taua, e le mafai ona ou lagolagoina atoatoa ai lena Tulafono Tau Faaofi.

Ma le isi mea lau Afioga i le Fofoga Fetalai, sa saunoa lou tuafafine lea e i ou autafa i le tulaga lea o le avanoa tutusa o tagata aemaise la i pisinisi. O lea ua taatia mai i le Tulafono Tau Faaofi, ua avanoa tutusa uma tagata ia e fai so o se ituaiga pisinisi i totonu o le tatou reserve list. O le lisi lea e aafia ai le aufai-pasi, le aufai-taxis, le aufai-rental cars ma so o se ituaiga retail shop, aemaise la...

FOFOGA FETALAI: Malie le sui usufono mamalu se i tuu atu le avanoa i le faauilavea a le Sui Palemia.

Tofa Hon Fonotoe Nuafesili Pierre Laufo: Lau Afioga i le Fofoga Fetalai, a o le i faaauauina le saunoaga a le sui usufono mamalu, o lea lava e tumau le reserve list. O lea sa faamanino atu talosaga e toai mai i le Komiti Faapitoa ona faagasolo ai lea i le tolu tausaga. O lena taimi atoa, e faasa ona o i pisinisi ia. E le o aafia ai lava taxi, o pasi ma mea uma faapena, e le o aafia i lalo o le polokalame lea.

FOFOGA FETALAI: Tulai mai le sui usufono mamalu.

Susuga Hon PAPALIITELE NIKO LEE HANG: Lau Afioga i le Fofoga Fetalai, o le Tulafono Tau Faaofi lea a le Afioga i le Sui Palemia, a silasila ane i le Fuaiupu 18(b) e faapea; (b) upon granting of citizenship, the investor is entitled to invest in any other business or economic activities listed under the Reserved List and the Restricted List in Schedules 1 and 2 of the Foreign Investment Act 2000. O lona uiga, e te sitiseni loa....

FOFOGA FETALAI: Malie le sui usufono....

18 FEPUARI 2015

Tulafono Tau Faaofi o Tulaga Tagatanuu i le Teufaafalugaina o Tupe Mai Fafu 2014 – felafolafoaiga i luga o le faitauga faalua

Tofa Hon Fonotoe Nuafesili Pierre Lauofo: Lau Afioga i le Fofoga Fetalai, e i ai laasaga tetele lea e i luma mai o le mea lea. O lea ua maa lava le mea lea ua agai i ai le saunoaga a le sui usufono, e le o aumaia... o le aufaipisinisi ia e omai, se e le o agavaa i lalo o mea ia e saunoa i ai le sui usufono mamalu. E le i taitai lava oo i na mea. O le mea lea e aumai i i, se i silasila o mea o lisiina o fanua ma le faiga o mea ia o process ina o agriculture, o fale gaosi oloa, o mea o mea tau tekonolosi. Ia vaai, o mea uma ia, ae le faapea o omai e fai ni fale taxi. Ia o ai se milionea e sau i Samoa e fai sona fale taxi? E mafai lava ona fai i Ausetalia ma Niu Sila e tele ai tupe a taxi e maua i ina nai lo Samoa.

FOFOGA FETALAI: E toe fautua atu i le sui usufono, agai a tatou saunoagai le tulaga lautele ina... o lea o le a matau ua tatou agai i le maioioina o le tatou Tulafono Tau Faaofi. E tatou te le i see i le tulaga lena, a o lena ua manino lau faamalamalama e aumai ai le atugaluga ae taofiofi a tatou saunoaga maioio i le tulaga auiliili o le Tulafono Tau Faaofi ae agai mai i le tulaga lautele lau Afioga.

Tofa Lealailepule Rimoni Aiafi: Lau Afioga o le mea e fia faasao faamolemole, o le saunoaga a le sui usufono o lo o saunoa nei, na amata lava i le Tusi Paia. O le saunoaga la lea ua oo i ai le sui usufono mamalu, o lea ua saunoa pei o le taimi foi lea na fai ai Iesu ia Mose, o Mose, alu i luga o le mauga ona e vaai lea i Kanana. E le i oo i ai Mose, ae ua vaai Mose i le mea o le a oo i ai le mea. O la e lauga sao i ai le Afioga, aua e alu lava oo i ai i le mea lea e saunoa i ai le sui usufono. Faafetai.

FOFOGA FETALAI: E matua vavamamao pei o sisifo ma sasae le faamalamalama i le faauigaina o le saunoaga a le sui usufono. Aua e te tali ia Lealailepule ae saunoa.

Susuga Hon PAPALHITELE NIKO LEE HANG: Faafetai atu i lau Afioga i le Fofoga Fetalai. Ia, e manatu foi ua lava ia lea lauga leaga ua amata foi ona omai tiapolo e faalavelave mai. Ma lou faaloalo lava.

FOFOGA FETALAI: Malo saunoa. Ia o le a lafo i lea Itu o le Maota. Tuu, ia o le a lafo atu, ona sosoo ai lea ma Levaopolo sosoo ai ma Lafaitale.

Tofa Hon TUUU ANASII LEOTA (Siumu) Faafetai i lau Afioga i le Fofoga Fetalai mo le avanoa e fai ai foi se faamatalaga puupuu e tusa ai foi o le Tulafono Tau Faaofi. Mo le silafia e le Maota sa ma fetuunai ma lou uso a faipule le Afioga ia Leaupepe i le aso ananafi, a i ai Tulafono Tau Faaofi ma te lagolagoina ona tulai lea o ia e faaleo, ae a tulai mai Tulafono Tau Faaofi ma te teena ona ou tulai lea e faaleo.

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

Lau Afioga i le Fofoga Fetalai, ou te tulai atu e fia fai sina faamatalaga puupuu e tusa ai o lenei Tulafono Tau Faaofi. I le faalogologo atu i saunoaga a sui usufono ua maea ona saunoa, e matagofie i le faalogologo, ae i ai saunoaga a sui usufono o le Palemene lenei i le taimi ina ua uluai faatalanoaina ai lenei Tulafono Tau Faaofi ma ou te fiafia e faailoa atu nisi nei o saunoaga, ðUa mativa ea Samoa ua tatou faatauina ai lo tatou tofi mai le Atua?ö O le isi saunoaga na faapea mai, ðOu te matua teena lava lenei Tulafono ona e moni e fai i isi atunuu e pei o Asia ma atunuu faapena, ae e le faatusalia a latou aganuu ma tatou, aua afai e o ese i latou mai o latou atunuu, e le toe foi. E pei la o Samoa a malaga i fafo, e naunau lava e toe fia foi mai e faauma o latou soifua i Samoa nei.ö

O le isi saunoagaí í ..

Afioga Hon Palusalua Faapo II: Lau Afioga i le Fofoga Fetalai o le mea e fia faamalamalama e faamalulu atu ai i le sui usufono.

FOFOGA FETALAI: Malie le sui usufono. O le a le mea e fia faamalamalama? (*I le Taitai o le Itu Agai*).

Afioga Hon Palusalua Faapo II: Leaga o lea e faalauaitele lana saunoaga, ae e tataua ona faalau mai suafa o i latou na saunoa tetee i le Tulafono Tau Faaofi. O le mea lenei leaga o lea e faalauaitele mai, ona lavea uma ai lea o lenei Itu, ae na ona fesoasoani atu i le sui usufono, e lelei lava le faalau mai po o ai na faia ia lafoga.

Ma lou faaaloalo lava leaga o lea e faalauaitele e aafia ai ma matou.

FOFOGA FETALAI: E pule lava le sui usufono i lana saunoaga lea e tau faafoe mai. O le uiga e pei o se tala faatusa lea e saunoa i ai le sui usufono.

Se i tulai mai le sui usufono mo Siumu. O ni mea faamaonia mea ia e te saunoa i ai Tuuu?

Tofa Hon TUUU ANASII LEOTA: Ou te le tali i ituaiga faauilavea ia lau Afioga i le Fofoga Fetalai aua o lenei e te silafia Tulafono Tumau. E moni au?

FOFOGA FETALAI: Saunoa Tuuu.

Tofa Hon TUUU ANASII LEOTA: Ua matua lagona lou popole i lenei Tulafono Tau Faaofi ona o nei tagata o le a omai aua e i ai taimi latou te nofoia ai o tatou nofoa i le Palemene lenei. Ou te popole i le lumanai o lau fanau ma tupulaga fai mai.

Lau Afioga i le Fofoga Fetalai, o manatu ia e mulimulitai ai se manatu. Lau Afioga i le Minisita e ou le Tulafono Tau Faaofi, aua ne i tee le uluga i finagalo faaalua aua o manatu e faatupu manatu e faufau ai lo tatou Malo.

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

E lagolagoina le agaga o le Tulafono Tau Faaofi i le vaega lea aua ni galuega mo alo ma fanau a le atunuu, ae silasila ane lava po o talafeagai le igoa o le Tulafono Tau Faaofi? O lea e muamua mai le citizen ae mulimuli mai ai le investment, ae maumau pe ana le faaaogaina le sitiseni e fai ma maunu. E le o i ai se isi mea e fai ma maunu e faatosina mai ai tagata milionea ma le au maumea ia e omai i Samoa? Aua o le popolega lea lau Afioga i le Fofoga Fetalaia, o le tatou faasinomaga. O le mea lava lea o lea e popole i ai, o sitiseni e aofia ai ma tusifolau. O tatou tagatanuu tatou te popole i ai aua le lumanai. E lelei tele le fuafuaga pe ana aveese le sitiseni. Aua o lea e matau atu o mea tau sitiseni ma tusifolau, e lua la o le Afioga i le Palemia ma lau atinae. Se i silasila ane i ia vaega ma faufautua ane i ai. Aua o lea sa e saunoa ailoga ua oo mai i nei le tamaloa lea o Yazaki. O le agaga foi lea aua e leai se faatosina na ave ia Yazaki. E le o moomia foi e Yazaki se tusifolau po o se sitiseni. O lea lava e gasolo mai ma o lo o gasolo mai lava latou e aunoa ma le faapea mai, òA le aumaia sou sitiseni ou te le alu atu ia outou.ö

O le tulaga lena lau Afioga i le Minisita, se i e silasila ane i ai aua e pei o le a faafaigofie ona tatou tuuina atu. O le Tulafono o lo o i ai nei e lima tausaga, a o lea e pei ua faavavevave i le tolu tausaga. E moni lava o lea ua e saunoa mai o lo o i ai le Komiti o laui. O lea foi e foliga mai e fialia o tatou tagata e faaoga passport Niu Sila ma Ausetalia. O Niu Sila ma Ausetalia atonu o lo o faafaigofie because they need the people with the brain - cheap labour.

O le mea lena o lo o faapena ona agai i ai, ae se i tatou silasila totoa i ai aua o lea o lo o faapea mai e matua iloilo lelei i latou e fia omai i totonu o Samoa e ave ma sitiseni Samoa. A tatou silasila i ai ia Amerika, Pereania, Farani seia oo mai ia Ausetalia, o le matua polofesa lava o tagata ia e iloiloina talosaga nei, a o la e sao mai lava le au faatupu faalavelave. E maualalo le \$4miliona le minimum lea ua aumai. E mafai lava ona latou faaaogaina tupe ia e momoli mai ai fuafuaga ia tatou te le moomia. O le mea lena o lea e i ai, po o le a lava le fai mai o le a, ma le a, a o lea lava e mafai ona fai. Aua o le mea lena o lea tatou te popole i ai i le oo mai o tagata faapena. Talofa e ia tatou ma lo tatou atunuu, ae manaia lau fuafuaga lau Afioga i le Minisita. A o le mea la o lea e tau fesili ai pe e le talafeagai ona saili i se isi mea e faaoga.

O lea foi ua e saunoa o lo o i ai ma aiaiga ma e tele puipuiga o le Tulafono ma e i ai ma aiaiga e mafai ai ona toe faaleaogaina pe cancel. O le a le aoga e toe cancel ai ae ua i ai se mea matuia ua tupu ma afaina ai le atunuu? E moni lava e manaia ua i ai puipuiga, ae tatou te popole lava i tulaga faapena i le tulai mai. Ua tatou vaai i ai i faalavelave tatou te le fia moomia. O le isi mea o lo o tau popole ai le manatu ma le mafaufau ia i latou nei e maumea, e faigata ona toe compete nai a tatou pisinisi o lo o faatino nei ona e i ai mea sa tutupu ma na matauina le taumafai atu o le tagata moni ia o le Samoa moni i ni pisinisi, ae o lo o i ai i latou e sili atu le tele o tupe ua mafai ona latou ofoina vaegatupe tetele ma le maua ai ni avanoa o nai o tatou lava tagata.

18 FEPUARI 2015

Tulafono Tau Faaofi o Tulaga Tagatanuu i le Teufaafialuegaina o Tupe Mai Fafu 2014 – felafolafoaiga i luga o le faitauga faalua

O le tulaga lena lau Afioga i le Minisita e ou le Tulafono Tau Faaofi, e i ai lava le manatu o tatou lava e moni o tofiga mai le Atua ma o filifiliga a o tatou itumalo, ae tatou te le tumau ai pea i nei tofiga, ae ia tatou faia Tulafono talafeagai ma lelei aua le lumanai o le atunuu. E moni e le faapea o fai le Tulafono lenei ina ia faaleaga ai le atunuu, e leai. O le agaga lava ia o le Malo e fia fai mea lelei mo le atunuu, a o le popolega lau Afioga i le Fofoga Fetalai.

O nai manatu na e avatu e tusa ai o lenei Tulafono Tau Faaofi e faufau ai finagalo o le Afioga i le Sui Palemia, le Palemia ma le Malo ina ia silasila totoa i ai. Ia aua ne i tulai mai ni faafitauli i le lumanai ona faapea mai lea, e le i i ai lava ni finagalo o le Maota lenei e faufautua ai i lea tulaga e pei ona tuuina mai ai lenei Tulafono Tau Faaofi?

O le agaga lena lau Afioga i le Fofoga Fetalai, e lagolago foi i fuafuaga aua galuega. O lea ua saunoa le Palemia i faatoaga. O lea ua uma ona fausia le falaoamata i le ulu, ua i ai foi ma le suauu i le avoka. A o mea ia e ao ona vaavaai i ai le Malo, tatou vaavaai i ai aua o lea e tele fanua o le SLC. Ia matua fai ni faatoaga tetele, ia aumai uma i ai i latou e le o maua ni galuega, ia faatosina mai loa la ma i latou e fai ni pisinisi e fai ai taro chips ma banana chips. Ia faatetele ina ia maua ai galuega, ona le toe i ai lea o se tulaga faapea e faalala i sitiseni ma le tele ai o le vevesi o le atunuu ma le popole i o tatou tagatanuu ma le sitiseni.

Ma lou faaaloalo lava, ia manuia le Fono.

Tofa Hon FONOTOE NUA FESILI PIERRE LAUOFO: Lau Afioga i le Fofoga Fetalai, e i ai nai vaega ia. Na ou musu e faalavelave i le saunoaga a le sui usufono, ae na o nai vaega lava ia e fia pai i ai e faasaosao.

Faafetai mo fautuaga, o lea ua faamau fautuaga, faafetai foi i le agaga o le saunoaga i le agaga e pei e lilifa agai i le lagolago o le Tulafono Tau Faaofi. Ua faamalo faafetai aua o fautuaga lelei uma. A lea e faamaumau, aua ia manatua foi a uma ona see lea o le tatou Tulafono Tau Faaofi i le Komiti o le Maota, ona silasila lea i mea faapea e pei ona laga mai, e pei o le igoa o le Tulafono Tau Faaofi. E ese le taua o lea mea o le igoa o le Tulafono. A sui, e sui po o le a se isi igoa e talafeagai ai ma sili atu le lelei. Ia vaai i le manaia, e manaia tele.

O le tulaga lea e i ai i le Yazaki, ia manatua o le Yazaki o lea e omai i lalo aua e leai se polokalame. A o le polokalame lea e aumai e le Tulafono Tau Faaofi lenei o lea ua faataoto mai ai se polokalame lelei e ui mai ai uma ni pisinisi tetele faapea e faigofie ai ona mataitu pe monitor ma silasila lelei i ai i le faagasologa o a latou atinae ma le faatuina o le atinae i Samoa ina ia aua ne i tulai mai nisi faafitauli mo le agai i luma. O le tulaga lea i totonu o le tatou polokalame lenei, ae i ai lava le mea taua lea aua o lea ua saunoa le sui usufono e faapea ina ne i omai tagata nei fao o tatou nofoa i le Palemene. Se ou te ofo foi au i lea finagalo faapea? E faapefea ona omai tagata mai fafo, o lona uiga na ona taunuu mai lava matai loa?

18 FEPUARI 2015

Tulafono Tau Faaofi o Tulaga Tagatanuu i le Teufaafalaluegaina o Tupe Mai Fafu 2014 – felafolafoaiga i luga o le faitauga faalua

E le silafia o tatou igoa matai ma e leai se isi e saofai i totonu o le Maota leni pe afai e le i matai ma faaee i ai suafa matai o aiga, usu le nuu, faapaia e le nuu, ave e resitala le suafa matai i Mulinuu ona faatoa agavaa lea e tauva i le palota, ae e leai se mea faapena e te i lava ua sau saofai i tua iinei, e le fetai.

Afioga Hon Palusalua Faapo II: Lau Afioga i le Fofoga Fetalai o le mea e fia faasao.

FOFOGA FETALAI: Se i maea mai ona avatu lea o le avanoa.

Afioga Hon Palusalua Faapo II: Ua uma Saina ona e faamatai.

Tofa Hon FONOTOE NUAFESILI PIERRE LAUOFO: Afai foi ua fai ni suafa matai, o suafa e le resitalaina. E le taulia la aua e le mafai ona o i le palota ma e le mafai ona omai i totonu o le Maota o le atunuu. Ia manatua lelei mea na. O le a te i lava ua fai mai e omai i totonu o le Palemene? Se o mea na e pei ona saunoa le Afioga i le Palemia, o saunoaga tau faafefe. Se o mea tau faafefe uma nei saunoaga.

Tofa Lealailepule Rimoni Aiafi: Lau Afioga i le Fofoga Fetalai, o le mea e fia faasao.

FOFOGA FETALAI: Se i uma ona avatu lea o le avanoa.

Tofa Hon FONOTOE NUAFESILI PIERRE LAUOFO: Ai seiloga o se tagata e le malamalama e fefe i ia saunoaga. A o lea tatou te malamalama i a tatou Tulafono, o lea tatou te malamalama i la tatou aganuu. E leai lava se mea e gase, se i vaai i le faigofie o leni Tulafono Tau Faaofi? Silasila, o le taimi leni e pei ona ou fai atu e pei foi ona saunoa ai nisi o sui usufono. E mafai lava ona ulufale mai le tagata mai lalo i le lima tausaga o le pemita nofomau, fai mai ua toatele tagata na omai ai ma ua maua ai sitiseni. A o le a so latou sao? O i ai ni atinae tetele ua fai e manuia ai le atunuu ma maua ai galuega? E moni lava atonu o fai ni nai pisinisi laiti, ae e le o maua le tulaga lea e moomia e i tatou. A o le tulaga lea e tau aumai i sitiseni, e pei lava ona ou fai atu ananafi, o matou foi o isi sitiseni Samoa, matou te manumanu foi matou ma matou puipui i le sitiseni. E le mafai ona aumai se Tulafono e faaleagaina ai a tatou sitiseni ma a tatou tusifolau, e le mafai leaga e taua ia matou, matou te manumanu foi ma matou puipui i le taua o le tatou sitiseni. A lea na saunoa le Afioga i le Palemia, o oe e te sitiseni Ausetalia, e i ai lou tusifolau Ausetalia. Ia se i silasila la, e pei o le tulaga lea lau Afioga i le Fofoga Fetalai.

Tofa Lealailepule Rimoni Aiafi: O le mea e fia faasao lau Afioga i le Fofoga Fetalai.

18 FEPUARI 2015

Tulafono Tau Faaofi o Tulaga Tagatanuu i le Teufaafalugaina o Tupe Mai Fafu 2014 – felafolafoaiga i luga o le faitauga faalua

FOFOGA FETALAI: O le faataatiaga o le tatou talanoaga ina ne i meaane ua tatou toso foi le aulapa uta, ae agai lau faamalamalama i le sui usufono na saunoa. E le mafai ona e faasaga i le isi faalavelave.

Tofa Lealailepule Rimoni Aiafi: Lau Afioga i le Fofoga Fetalai, ou te fia agai la i le sui usufono lea na saunoa nei.

FOFOGA FETALAI: Ia, ua lelei.

Tofa Lealailepule Rimoni Aiafi: O le mea lenei o le omai iinei o tagata ia i le palota. Ia manatua foi le tatou faiga palota lea na tuana'i atu na tauva ai le alii papalagi ua maua lona suafa matai, ae e le i fanau i Samoa? Ana malo la le papalagi lea i le palota lea na uma atu, meamanu ua faafitauli i totonu o le Fono lenei, meamanu ua nanunanu lava na o ia i totonu iinei. Aua e tatau ona alu i le Tulafono, ae e te le i sau i le Maota, ia e iloa tatalo i le tatalo a le Alii, ia e iloa usu le vii o Samoa i le gagana Samoa. O le mea lena o lea e fai atu ai, ua uma ona tupu le mea lea e le faapea e le i tupu.

FOFOGA FETALAI: O lea ua maua atu lou finagalo le sui usufono mo Faleata Sisifo.

Tofa Hon FONOTOE NUA FESILI PIERRE LAUOFO: Lau Afioga i le Fofoga Fetalai, e lelei lava le fai ma faamalamalama. Ou te ofo foi au, e faamalamalama atu o lea ua malamalama ae fai mai lava saunoaga faapea.

O le papalagi lea sa tauva, o le matai Samoa ma e sao, ae e le i sau e faapea o se tagata faipisinisi na sau ma ni ana miliona, e leai. Na mafua aisea ona sitiseni? Ona ua faaipoipo atu i le tamaitai Samoa. E fa sitiseni ia na ou faamatala atu. Silasila la i ai, ua faaipoipo atu i le tamaitai Samoa lea na mafua ai ona maua le sitiseni. E le i maua i lalo o le vaega lea.

Afioga Hon Palusalua Faapo II: Lau Afioga i le Fofoga Fetalai, leaga o lea na tau lou igoa e le Afioga i le Sui Palemia.

O le mea lea ua tupu ae i lou loto lau Afioga i le Fofoga Fetalai, ua ou alofa i le Sui Palemia. Ua pei lava o le sumepalo tagitagi i le tulaga lea e i ai o le tu i luga, tu i luga ma lauga. O lea ou te fautua atu i lau Afioga i le Sui Palemia, ia lava lou onosai leaga o le sitiseni a Samoa lea e talanoaina. A o lou tulai ae fai mai o le a ma le a. O le aitu lava le moomu, o le papalagi lava lena lea na saunoa atu ai.

FOFOGA FETALAI: Le Taitai o le Itu Agai, o lea o le a ou faamalamalama atua le tulaga lea e te atugalua i ai. E le mafai ona le tuua le avanoa i le Sui Palemia leaga e tatau ona tali atu i a outou tuleiga ma saunoaga.

18 FEPUARI 2015

Tulafono Tau Faaofi o Tulaga Tagatanuu i le Teufaafalugaina o Tupe Mai Fafu 2014 – felafolafoaiga i luga o le faitauga faalua

O le tulaga lea i le alii papalagi lea na taua, o lea e i lumamea i le Laulau a Fono le Tulafono o Faiga Palota e toe teuteu. E le o se mea la e atugalua i ai lo tatou Maota, a o mea lava e vaavaai i ai aua e le faapea e sagatonu mea uma i le tele o taimi. O lea foi e fai ma liolio i tulaga uma ina ia atagia le mea lea e atugalua i ai sui usufono, ae aua tou te atugalua ona o le mea na tulai mai, ae e faapena e i ai lava lape o Tulafono, ona tatou manatunatu lea e toe teuteu mo le faaleleia atili.

Tulai mai le sui usufono mo Siumu.

Tofa Hon Tuuu Anasii Leota: Lau Afioga i le Fofoga Fetalai, leaga o lea sa saunoa le Sui Palemia. O lea sa ou faalau atua finagalo o nisi o sui usufono o le Palemene leni. O lea sa ou tolaulauina atu le popolega i omai tagata nei ona nofoia lea o nofoa nei.

Ou te ioe foi i ai aua o lea na aumai e le Susuga Hon Papaliitele Niko Lee Hang le vaega o le Tusi Paia, o le tupe o le pogai o mea leaga uma. A oo la i le tulaga o le corrupt, o le mea lena e oo i ai ma o lou popolega lena.

Ma lou faaaloalo lava.

FOFOGA FETALAI: O lea ua maua lou finagalo. E manatu leaga o lea na tulituliloa atu e le Sui Palemia finagalo o sui usufono na saunoa.

Tulai mai lau Afioga i le Minisita mo Galuega tau Alamanuia ma Atinae a le Malo.

Afioga Hon Lautafi Fio Selafi Purcell (Minisia mo Galuega tau Alamanuia ma Atinae a le Malo): Na o se mea lava e fia faasao i le saunoaga a le sui usufono ona o lea e taua ai le Matagaluega o lo o i lalo o lau vaaiga.

O le saunoaga a le sui usufono mamalu e faapea ua tele fanua o le SLC ina nei i faafofoga mai le atunuu lea sa talosaga mai i ni a latou lisi ona faapea lea ai e le moni le tala a le Minisita ma le Matagaluega. O le taimi nei e leai ni fanua o le SLC o avanoa e fai ai nisi tulaga e pei ona saunoa i ai le sui usufono mamalu, o lo o faatofutofusia uma lava i tagata o lo tatou atunuu ma nisi foi fuafuaga a le Malo o lo o i ai.

Ua na o se mea lena e fia faasao lau Afioga i le Fofoga Fetalai.

FOFOGA FETALAI: E manatu uaí ..Leauepepe.

Afioga Hon Leauepepe Toleafoa Apulu Faafisi (Aana Alofi Nu.1): I lou ava ma lou faaaloalo lau Afioga i le Fofoga Fetalai ona o lea sa laga au i uluai upu o le saunoaga a le sui usufono mo Siumu.

FOFOGA FETALAI: O le a la le mea lea e te finagalo i ai aua o la oulua lauga faatasi lea sa saunoa i ai le sui usufono mo Siumu, po o lea e te fia saunoa?

18 FEPUARI 2015

Tulafono Tau Faaofi o Tulaga Tagatanuu i le Teufaafaigaluegaina o Tupe Mai Fafu 2014 – felafolafoaiga i luga o le faitauga faalua

Afioga Hon Leaupepe Toleafoa Apulu Faafisi: E fia faamalamalama le isi vaiiliu lea e le o matua maua mai ma toeitiiti lava maua mai e le Sui Palemia.

Ona o le saunoaga a le sui usufono mo Siumu o lo o faapea mai o fautuaga ma tuualalo, a o le popolega o le manatu o Tuuu ma au, tulou e sala le gagana i le faafofoga mai a le itumalo o Siumu, e le tumau ai pea le Sui Palemia i o ma le Faigamalo.

O le ala lea o le manatu e avatu le fautuaga ma se tuualalo, leaga ina ne i t e i ua see atu le Itu e Agaia le Malo i o sese ona faaoga le mea lea. O lea e silasila i ai le Malo ma le Sui Palemia ia mapo lelei le tapenaina o le Teuteuga o le Tulafono.

O lo ma taofi faamolemole, se i faauma atu lava upu ia. O lo ma taofi e i ai le upu a le faafafine, òSe oo ia i ai ma se i fa lena Tulafono pe a.ö Aua e tau tatau se manatu i le itu lea, so o se mea lava e faatino e le Faigamalo a le HRPP e pei o taavale ma isi mea í

FOFOGA FETALAI: Malie le sui usufono, se i avatu le avanoa i le Afioga i le Palemia.

Susuga Hon Tuilaepa Fatialofa Lupesoliai Aiono Neioti Sailele Malielegaoui: Lau Afioga i le Fofoga Fetalai, ia manatua foi o au o le faatama o le vaega lea o faafafine. E le i atoa ona e aumaia le sao. O le sao o le mau lea faa laõ vaega o faafafine, òSe o ia i ai ma gogoto ai.ö

Afioga Hon Leaupepe Toleafoa Apulu Faafisi: Ua malie foi lou sui usufono i le saunoaga a le Afioga i le Palemia, faafetai.

FOFOGA FETALAI: Tulai mai lau Afioga i le Taitai o le Itu Agai.

Afioga Hon Palusalua Faapo II: E le tuumamaina tuuaiga e faapea a matou o atu i o aua o le mea lena o lea o le a tupu nei talu ai le Tulafono Tau Faaofi lea. Na ona matou o atu lava soloia loa ma le Tulafono lea.

Lau Afioga i le Fofoga Fetalai, o lea lava ua matau atu e lenei Itu lauga a lena Itu aua o le latou Tulafono - na ona faapena atu.

FOFOGA FETALAI: O lea ua maua lou finagalo, taatia mai pea i le Nofoa ou te matauina, ae agai le sui usufono ia e sauni lana lauga ae taatia mai pea le matauina o lauga o lea ou te matauina atu.

Tulai mai lau Afioga i le Palemia mo le Saunoaga Faa-Minisita.

18 FEPUARI 2015

SAUNOAGA FAA-MINISITA A LE AFIOGA I LE PALEMIA

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: Lau Afioga i le Fofoga Fetalai faapea foi le mamalu o le Maota, ua ou tulai atu ma le agaga faaaloalo ona o le taua tele o le Tulafono Tau Faaofi lenei ua i le Laulau a Fono a le Palemene, o le Tulafono Tau Faaofi e uunaia ai teugatupe teu faafaigaluega mai fafo mo le atinae o le tamaoiaiga o Samoa; o ituaiga pisinisi eseese aua galuega mo a tatou fanau. O le Tulafono Tau Faaofi atoa len . O le faatosina mai o teugatupe a tagata mai fafo atu o Samoa e teufaafaigaluega, i ituaiga pisinisi eseese mo galuega mo a tatou fanau. E puupuu lava, ae loloto le agaga lelei o le Tulafono Tau Faaofi.

Ua uma ona saunoa manino le Sui Palemia i gaoioiga eseese i le tapenaina o le Tulafono Tau Faaofi lenei. E tolu tausaga o faatalanoa ma tapena e i latou o lo o i ai le potu masani. O Faufautua poo Faauluuluga o Matagaluega e faufautua i lo tatou Malo. Sa faatalanoa e le gata o totonu i Komiti faapitoa a le Malo, ae faapena foi i faatalanoaga faalauaitetele ma le atunuu. O lea ua logoø logoø le tatou Maota nei. A maea felafolafoaiga i totonu o le Palemene lenei, o a tatou faiga faavae ia faaetulafono, ole toe foi atu o le Tulafono Tau Faaofi i le Komiti o Tulafono a le Palemene, toe maua ai isi mau avanoa e tele e toe faatalanoa atili ai le Tulafono Tau Faaofi lenei ma le mamalu o lo tatou atunuu. O le tatalo, ia maua foi ni outou avanoa o sui usufono e o atu ai i le Komiti e toe molimoli i ai outou finagalo. E leai lava se tulaga faanatinati o le Tulafono Tau Faaofi lenei. O le agaga o le Sui Palemia, le Matagaluega ma le Kapeneta ia matua sausi lelei le faatalanoaga ma le iloiloga o le Tulafono Tau Faaofi lenei.

Lau Afioga i le Fofoga Fetalai, o le taofi o le isi toeaina ina ua faalogo i le Tulafono Tau Faaofi, fai mai a ia, òSe e taua tele le Tulafono Tau Faaofi lenei, e leai se agaga polokiki o i ai.ö Sa ou fesili po o le a le uiga ó o lona finagalo. Na ia faamatala, o le uiga ma o lona taofi foi lea e mamao tele le vaai a le Tulafono Tau Faaofi mo le lumanai manuia o fanau a Samoa, i augatupulaga fai mai a le atunuu pe a faatusa i le vaaiga faapolokiki. O le vaaiga faapolokiki e muta le vaai mamao i le faiga palota o le a sosoo ai, ae o le vaaiga tulaia a le tulafono, e mo tupulaga fai mai o le lumanai (Politicians plan for the next General Elections Statesmen plan for future generations).

O laua faamalo lena ma lau faafetai i le Sui Palemia ma lana Matagaluega i le mamao, mamao, mamao o le latou vaai mo le lumanai o fanau a Samoa i le sailiga o ni galuega, e le gata i fanau ae faapena foi i tagata lautele o lo tatou atunuu o lo o fia maua ni galuega. O le toatele lava o latou ia, e o atu i lou Ofisa ma Ofisa o Minisita, ma latou talosaga, òSe faamolemole, matou te moomia ni galuega ua l lavav o e galulue i le eleele.ö Le eleele lea tatou te laulauvivilu ai o le tofi mai le Atua.

18 FEPUARI 2015

Saunoaga Faa-Minisita a le Afioga i le Palemia

Ua le lavav o e galulue ua manao i se galuega e maua vave ai se tupe aua tulaga masani o le soifuaga o lo o tatou i ai. Ae mo Matua, o le taua o le Tulafono Tau Faaofi lenei e mo le lumanai o fanau i le tau sailiga o galuega e galulue ai ina ua toe foi mai mai aoga sa aoga ai. E ao ona tatou matua faataua le agaga lelei o le Tulafono Tau Faaofi.

O le aso ananafi pe a manatua, sa matua tumutumu ai le Maota lenei. Na tumu faasolo atoa i a tatou fanau o lo o aoga i le Iunivesite o Samoa. A foi mai fanau na i le isi tolu tausaga o lo o lumanai nei ma faailoga tikeri. O le fesili tele lava o le a tulai mai, o fea la galuega o le a galulue ai? Pe a faapea e foi mai le 500 i le 2018, 500 i le 2019, 500 i le 2020, o fea galuega o le a galulue ai?

Lau Afioga i le Fofoga Fetalai ma le mamalu o le Maota, o le fesili lena o lea e aumai pea, aumai pea, aumai pea ia te au e Matua. O le a le luitau ogaoga o le a faafeagai ma Faigamalo i le 5, 10, 15 ma le 20 tausaga o lumanai? E tasi lava le tali. O le luitau aupito ogaoga e feagai pea ma Faigamalo i le lumanai, o le saili o galuega mo a tatou fanau e foi mai aoga. E le na o le tatou laulauvivilu i aoaoga ia lelei mo a tatou fanau, ae ia tatou matua faataua foi le sailia o galuega e faaiu i ai le aoaoga ma le poto ua maua e a tatou fanau ua toe taliu mai i aoaoga maualuluga sa aoga ai. E le faapea tau ina ave fanau e faaaoga. A iu ona foi mai loa lea nofonofo?

O au lenei o le Taitai o lo tatou Malo, faapena foi Minisita, aemaise lava le Minisita mo Aoga, Taaloga ma Aganuu ma le Vaega Faaupufai lenei o le HRPP e toai mai i ai mafatiaga o matua ma a latou fanau ua foi mai ma tikeri, ae leai ni galuega e faaaoga i ai i latou. O le fesili lau Afioga i le Fofoga Fetalai, o le fesili mo tatou uma lava, o fea e ave i ai le faamuamua? O le fesili taua lena. E le o au ea o matua fanau ia aoaoina lelei ma maua galuega e galulue ai? O le uiga lena o le upu o au o matua fanau. Ia aoaoina lelei, ia i ai togafitiga e togafiti ai pe a mamai ma ia i ai ni galuega e foi mai ma galulue ai. Se mea leaga ea le faataoto o ni fuafuaga au i luma e saili ai ni galuega mo a tatou fanau? Ou te taofi o se fuafuaga e matua tatau ona fai ma faataoto e le Malo. O fuafuaga e fanau mai ai le fua aog i tua atu o le faiga palota o le a sosoo nei. Ia aog e le na o le tasi le augatupulaga, ae ia aog faalausosoo mo le tele o augatupulaga o mulimuli mai.

O le valaauina o i tatou lau Afioga i le Fofoga Fetalai, i tatou uma lava o i totonu o le Maota lenei, o Taitai o le atunuu i totonu o le Palemene lenei, o le tatou tiute patino ogaoga ma le taua lea. E le o se tiute na o au ma le Kapeneta ma le HRPP, a o le tiute e patino ia i tatou uma na tofia ma valaauina ia tatou omai i totonu o le Palemene lenei ma faaaoga tatau ai taleni na aumai e le Atua ia i tatou.

Saunoaga Faa-Minisita a le Afioga i le Palemia

Ua ou faalogologo lelei lava i le tolaulauina mai e isi nisi o vaega o le Tusi Paia, e faavae ai lo latou tetee ae lea aumaia Faataoto ogaoga e fitoitonu lava i le aso leni. O a Faataoto? O Faataoto a lo tatou Alii faatatau i le faaoga tatau o taleni na aumai ia i tatou. E le na o mo lo tatou manuia i le taimi nei ae mo le manuia o fanau a le atunuu leni o le lumanai o lo o faalagolago mai ia i tatou taitoatasi mo lo latou lumanai manuia. E tatau ona tatou momoe manatunatu loloto i ai i ni auala eseese e fou tatou te faaoga ai i latou. O metotia ia o lo o faataatia atu e le Tulafono Tau Faaofi ua iloa ma ua faaoga e le tele o atunuu e atiae ai le tele o galuega fou mo a latou fanau o le lumanai.

Lau Afioga i le Fofoga Fetalai, tatou te matau ma le totoa i metotia o lo o faaoga foi e isi atunuu e atiae ai o latou tamaoiga e ui o nisi o na atunuu e oa i eleele, oa i tagata ma oa i minerale eseese o le natura. O mea ia tatou te mativa uma ai lava. E le lava eleele, e le lava tagata e i ai tomā faapitoa ma e leai ni tatou minerale. O lea foi a oo ina fai o tatou auala ma taumafai e tauofo ina ia bring out the best in our people mo o tatou lava tagata. E uma atu le auala ae tulai mai le mau faitio, e leaga auala. O le a le mea e le aumai ai tagata mai fafo e faia lelei o tatou auala? Ua faafia ea ona aumai i luga i le ea, ua faafia ona aumai i luga i televise, ua faafia ona aumai i luga o faasalalauga? O lea e taumafai le Malo e faaoga tama fanau a le atunuu. Po o le a lava le faaletonu, a o lea lava e i ai le tuualalo faapena foi ma le tulituliloa, ae i ai lava taimi e tulai mai ai nisi o tautua ua le gafatia e o tatou tagata. Ona faapefea lea? Tatou apaapa loa lea i fafo.

O se faaitaiga, o le mafuaaga lena lea e laa ai a tatou gasegase i fafo e togafiti i Niu Sila. O le aso na tatala ai le tatou falemai fou ua i ai nei, o lau upu na fai i fomai, o lo outou falemai fou lena. O lena ua faaaupega i tulaga faanei onapo; o ane loa e faaoga. O lau matau, ona pau le mea lea ua numera tasi ai a tatou fomai i le taimi nei o le ave o mai i fafo e togafiti ma tau aoao faaitai ai fomai i Niu Sila ma atili popoto ai. A o lea e avatu e tatou gasegase e aoao ai fomai a Niu Sila.

O le tolu tausaga talu ai, e lata i le \$40miliona le tupe a Samoa lea e alu i fafo e togafiti ai a tatou mai i Niu Sila. O Fiti na o le \$100,000 e faaalu i fafo i le tausaga mo mai e ave i Niu Sila. A o lea lava e togafiti e a latou fomai le toatele o a latou ma. Faapena foi Toga. E i ai taimi e tutupu ai mea faapea. Ona taumafai lea o le Malo e faataoto fuafuaga mamao mo le tali atu i manaoga eseese a lo tatou atunuu.

18 FEPUARI 2015

Saunoaga Faa-Minisita a le Afioga i le Palemia

Lau Afioga i le Fofoga Fetalai, o le teufaafaigaluega o tupe mo pisinisi mai fafo, o se auala o lo o fai e atunuu uma lava o le lalolagi. O le auala lena e tele ai latou galuega fou. O atunuu uma lava, o atunuu malolosi ma atunuu vaivai e faia auala ia, ae faalagolago le taunuuga lelei o fuafuaga faapenei i le lava o faatosina e ofoina atu e tupu ai le fia o i ai o i latou ia ma a latou tupe e atiae ai. E le o po malae i le tele o faafitauli, le anoano o faafitauli e tupu ai le agaga musua o le aufaipisinisi maumea mai fafo e tosina mai i Samoa. O a ia uiga faigata? O le mamao o le mea e tau omai ai mai fafo. E faigata ona afea ma fesootai gofie i faigamalaga i vaalele. Ma le toagaogao o le faitau aofai o o tatou tagata e i ai taleni faapitoa. A lea e masani ona ou talanoa ai i nei mea o aiga fuafuaina ina ia taofi ia lena mea faavalevlea ona ua avea lena ma mea ua le tupu ai le faitau aofai o tagata i Samoa. Tatou te moomia tagata e faia atinae. O le a le feau o lo o aumai i le Tusi Paia? Ia matua faatoatele tou fanau ia pei o fetu o le lagi ma le oneone o le matafaga. O le feau tuufaasolo lea a le Atua i le tatou tama o Aperamo na tupuga mai ai Samoa. O lea e tau saili ni tama taaalo lelei lakapi ona e matua laititi lava le tatou player pool poo le faitauaofai ia o tatou fanau taalo lakapi. O Fiti toeitiiti lava oo i le miliona tagata. O tatou, na o le selau valusefulu afe paupaua lava lea e i ai i le tele o tausaga. O lea lava e tumau ai lava. E leai se sii i luga. Ae faapefea la ona tatou asosi e atiae, e l lava tagata e faatinoina ia atinae, o i ai taleni faapitoa. O isi o latou e ono tali mai i faatosina nei e tuu atu i le Tulafono lenei o le aufaipisinisi o loo latou moomia se isi sitiseni e faigofie ai ona malaga asiati e vaai a latou pisinisi eseese e talia gofie ai le tagatanuu o Samoa. Nei, o le matua faigata lava i le Asia e sau i Samoa ona afea Niu Sila ma Ausetalia e vaalele ma malaga asiati mai ai i Samoa. Sa ou taua i le isi au tautalaga faalauaitete le itu lenei. Ua taoto fuafuaga mo le lesitalaina aloaia faavaomalo o le tatou Iunivesite Faafomai o le OUM i Motootua. E i ai le Kolisi maua luga a Amerika e i Filipaina, o le a o mai ai sui e toalua, e siaki le aoga mo le lesitala aloaia faavaomalo ma latou aumai malosi ai le fausia o se falemai tele fou e taua o le Teaching Hospital poo se Falemai Faaleaoaoga e tua i ai le OUM. O lea ua lalata i le taimi e o mai ai, ae sau le latou talosaga ia te au sei ou alofa, sei ou avea se tusi i le Malo o Ausetalia e auala atu i le High Commissioner, sei mafai ai ona omai i le alavaa e afea ai Ausetalia ua fiu e faatali se visa. O lea foi e i ai ia mau talosaga o lo o taoto i luga o lau kesi ma isi foi tagata e fia asiati mai i Samoa i le faigata lea ona oso mai Fiti, i tulafono foi a Fiti e aafia ai tagata e faimalaga mai i Samoa e afea ai muamua Fiti. Faapena foi Niu Sila.

Saunoaga Faa-Minisita a le Afioga i le Palemia

Lau Afioga i le Fofoga Fetalai, i atunuu Arapi, e matua faigata ona talia oe, e afea latou pe afai o lea e i ai foi ma lou visa e te alu atu ai e te afea Isaraelu, o lo o vatau ma isi foi atunuu Arapi i le Ao ma le Po. E faapena foi Isaraelu, e matua le talia oe pe a muamua e afea soo se nuu o Arapi. Lau Afioga i le Fofoga Fetalai, tasi lena mafuaaga lea sa saunoa i ai le Sui Palemia, o le matua faigata i le aufaipisinisi ona malaga i lea atunuu ma lea atunuu o lo o i ai a latou pisinisi e siaki, ma vaai poo alu i luma po o solo i tua. O le ala lena e manaomia ai e isi faipisinisi o le lua tolu fa tagatanuu ona e faigofie ai lea ona faatino mea ia. O Samoa o se atunuu o lo o aloaia lelei, aloaia e le tele o Malo o le lalolagi. E faigofie ona afea e tagata femalagaai pe afai e maua e latou ia se avanoa faapea. Ona latou faigofie lea ona malaga i atinae eseese o lo o faatu i le tele o atunuu, o lo o fia asiasi i ai. Sa ou taua i totonu o le Maota lena lau Afioga i le Fofoga Fetalai ma le mamalu o le Maota, atonu e manatua, le isi foi faipisinisi e i ai lona fale i Niu Sila i le polokalame foi faapenei a Niu Sila e pei o le tatou polokalame. Sa ou faapea e asiasi mai e faatu sana pisinisi i Samoa. Ae faatoa ou tei i le talanoa mai, ōe leai ou te sau ou te eva, ou te sau ou te tafao i le manaia o le tou atunuu. Ona ou fesili lea i ai i ana ia foi atinae. Ae fai mai, e i ai lona fale e nofo ai i Niu Sila, na faatu ai i luga o le polokalame faapenei a Niu Sila. Ae laititi lava le taimi e nofo ai i Niu Sila ona o le tele o ona taimi, e malaga ai i lea nuu i lea nuu aemaise, Sigapoa, Ausetalia, ma Saina, o lo o tele ai ana tupe teu faafaigaluega. E toesea ai pea o ia. E tatau ona alu e asiasi ma mataitu. Manatua foi le muagagana, e leai umi loa le pusi taaalo loa isumu. Sa ou fesili, e tele la ni nai au mea o fai i Niu Sila? Ae soiso le alii ma faapea mai ia te au, ōOh New Zealand is too small for me,ō E laititi tele Niu Sila e maumau ai lou taimi ma au tupe.ō Lau Afioga i le Fofoga Fetalai, o le mea lena o lea o lo o sasi atoa ai le mau saunoaga i le Maota lena. Ua pei o Samoa o le a matua lolofi mai i ai le lalolagi, le a lolofi mai i ai ni tagata se toatele. Pau lava le mea lea e agaga i ai le Tulafono, a mafai ona sao mai ai ni nai pisinisi faaopoopo se 5 poo se 10 talu ai le Tulafono lena, manaia tele. Ua limasefulu nei tausaga talu ona faagasolo le isi foi a tatou Tulafono e faatosina mai ai pisinisi na pasia e le faigamalo a Mataafa i le tausaga e 1965. Faatosina ai teugatupe mai fafo i Samoa nei. O na foi faatosina, na mafua ai ona sau Yasaki ma le faletalimalo la le toetiiti maea i Taumesina i le taimi nei fausia e faipisinisi mai Papua New Guinea. Toeitiiti lava galo ia te au ma le isi. O le falepia lea o le Vailima mai le kamupani o le Brauhaase mai i Siamani. O le tausaga e 1975 (40 tausaga talu ai) na ma asiasi i ai i le kamupani lena ma le Minisita o Tupe i lena vaitaimi.

18 FEPUARI 2015

Saunoaga Faa-Minisita a le Afioga i le Palemia

Sa matou talanoa ai ma tuu i ai le faatosina e o mai e fai se pia i Samoa. Folafofa i ai ma faatosina la ia o tiute ma lafoga ua tuuaunoa. E pau lava le fesili na aumai, e a mai le tou vai? A lelei le vai ua faigofie ona fai le pia lea i Samoa. Lea la na tatala ai le faleava lea lauiloa i le tausaga e 1978. O le tu mataina o le tatalaina o le faleava lenei, ua fiu e sue se faifeau e alu atu e fai le lotu mai le fonu a ekalesia. Saili saili, ae fealofai uma faifeau. Tuu loa ia Patele Tovio e lei auai i le fonu. O Patele Tovio o le failautusi, Fesili Patele Tovio mulimuli ane ai, o le a le mea ua le alu iai se isi faifeau. O le tali o ai le faifeau e alu e faapaia lea atinae ua taʻu agasalaina e le toatele. Le taeao na tatala ai le faleava, ua tau fai faalologo uma faifeau po o le a le upu a Patele o le a fai aua foi o le ava, o le ava e matua fetuu e le aiga Sa Levi. Ae faalogo atu, ua sau le tatalo faamanuia a Tovio. ōFaafetai le Atua faafetai i lau foai ia Samoa. Ia e fesoasoani liligi atu faamanuiaga ia i latou o le a tagofia le ava, aua foi o lo o tusia o le mea e sau mai fafo i totonu o le tagata e lelei. Sei vagana le mea ua sau mai totonu o le tagata i fafo ua leaga. Ia e fesoasoani ia i latou e fasi ava ona o le Ava. Ia tuu lena amio o le on faavalevaea, soona ave le mafaufau ai le taavale ma lavea ou tagata. ōUa tautui nei faifeau ma faapea ane, o le a le mea na tatou le manatunatu ai in upu. O le tulaga maoae lena o le faleava lenei i lena foi vaitau, ao Palemia le Tulafale Leulumoega o Tupuola Efi. Na o le tolu pe lava atinae tutua. Ou te le taua isi mea laiti na o mea tetele. Pau lava ia o mea tetele ua mafai ona aumai i totonu e na foi Faatosina. E le o se atunuu e faigofie ona o mai i ai tagata maumea e teu ai latou tupe. A uma ane le isi limasefulu tausaga i le lumanai ina ua pasi le Tulafono lenei, ae ofi mai ai ni kamupani e pei o le Yazaki se sefulu, ma avatu ai ni tagatanuu se sefulu ae faapea foi le tele o galuega se 20,000 ni galuega fou e maua ai, oka ua maua le ai o le Tulafono. Ua matua tele le tau lelei o lenei Tulafono. O le a matua pepese alleluia ai latou o matua o le a faigaluega ai a latou fanau, e pei foi ona pepese ai aiga o lea e faigaluega a latou fanau i le Yazaki. O le agaga atoa lena o le Malo ia maua mai ni pisinisi faapea. A maua se lima ono fitu valu iva sefulu ni atinae tetele oka tatou te le toe fia manatua lauga palaaai na faia i totonu o le Maota lenei. Ua maua le tau lelei o le Tulafono aemaise le tele o le tapenaga na fai i ai. Tolu tausaga o tapena. E le o se taimi puupuu. E atagia ai iina le faautautaga tatau ma le atoatoa o le tapenaga na faia e le Minisita ma lana Matagaluega.

Lau Afioga i le Fofoga Fetalai, o le fili ogaoga e faafeagai pea ma atinae tetele e tatau ona fai mo le tatou atunuu, o le uiga masani lea, o le fefe, palaaai loto, lea foi ua tau lavea atu ai ma le tatou lakapi taitoafitu.

18 FEPUARI 2015

Saunoaga Faa-Minisita a le Afioga i le Palemia

I le taua lona lua o le lalolagi, miliona ma miliona tagata na maliliu ai i uluai tausaga o le osofaiga a Hitila i Europa, faapea foi ma Asia i osofaiga a Iapani sa le tatau ona maliliu. Aisea, ona ua matua nofonofolelei Amerika ma ana mea tau matautia ma le malolosi ua matua mumusu e fai se fesoasoani, ona o le fefefe o tagata lautele, ua matua faavaivailoto i o latou taitai, nei tei ua toe tupu le mea na tupu i le taua muamua o le lalolagi ma tele ina feoti ai fua tagata Amerika. Fai mai latou, se soia ia le toe soona o tatou te toe tau, ma maumau ai ola o a tatou fanau i taua ese i o latou atunuu ma o latou laufanua, e le o ni tatou taua. O lo o malu puipuia tatou e vasa tetele o le Pasefika ma le Atelani. Policy ia na taua o Isolationist Policy a Amelika. O uiga ia na faapogai ai ona lauga le Peresetene ma faaoololomaau i upu nei, õthe only thing to fear is fear itself.õ Pau lava le mea ua tatou toilalo popo ai Amerika o le fefevavale gofie. O le gasegase lena lea na faafeagai ma le Malo o Amerika õo le fefefevale o ona tagata.õ Ua taofiofimau ai ma le Peresetene ma le Fono a Faipule ua le mafai ai ona ave se fesoasoani ma maliliu fua ai le aoga le miliona ma miliona o tagata o le lalolagi. Lau Afioga i le Fofoga Fetalai, o upu na a le alii Peresetene sa tau lalaga ai le loto faatoatoa o tagata lautele, ma ua alofia ai le siitau, siitau loa faasaga ia Siamani ma lona soatau o Iapani. Ana le tapomu faavalevalea lava e Iapani fuavaa o Amerika o lo o taula lelei ma momoe i Hawaii, e nofonofolelei lava Amerika e le o i se taua. Faatoa iloa ai iina e Taitai o Amerika ma tagata lautele, e matua leai se malu o Amerika e maua i le soona tetele vale o nei vasa loloa o le Pasefika ma Atelani ó e osofai gofie e vaalele tau ma vaamaulu faaauepegaina i mea tau matautia faaneionapo ua gaosia. Ua tatou iloa uma. Na ola le taua ina ua faapa i se uluai taimi le pomu atomika. O le a le mea lea ua tupu i le lalolagi i le taimi lenei? O le misa lava o ia Malo, punavae i ai Amerika ma auina i ai ona vaaleletau. Ua maua le lesona aoga. O le a le lesona aoga? E le faapea o lou nofonofõ ma lou tetemu i le fefe e fofõ ai ou faafitauli. A e l gaoioi, e tupu pea ma tilotilo mai pea ia te oe mala ma puapuaga Palusalua ma lau faapuna i lalo o le moega, o lo o e tetemu ai i le fefe. Naõ ou mulivae o lo o aliali mai i fafo.

Ina ua faatalanoa Tulafono faatosina, o le 1965, o iu leo foi o le fefe na lagonaina e lo tatou atunuu. Anoano mau tetee faasaga i atinae o turisi, i faletalimalo e ono fausia. Fai mai o le a talepe ai aganuu a Samoa. Lea foi ua tatou toe faalogo i ai. O le a talepe ai aganuu a Samoa. Ua a nei? Lele ua taula i ai atinae uma a Samoa i le atinae o turisi. E vave faatupulaia ai tupe maua mo fefaatauaiga ma galuega mo a tatou fanau.

18 FEPUARI 2015

Saunoaga Faa-Minisita a le Afioga i le Palemia

Ina ua faamaonia le Tulafono o le VAGST. Na pasi i le tausaga e 1994, e saili seleni ai le Malo e faatelevave ai ana atinae mo galuega mo a tatou fanau, savavali tetee ai le toatele faatasi ma taitai o Ekalesia na unaia e le Itu Agai. Lea lava e tagitagi i ou taliga upu taufaifai i le Malo i lena vaitau o le mau solo tetee, e aumai na vaalele, e fau na fale, ma na auala e ai? Upu ia, sa lafo ia Tofilau ma matou uma i le Malo. Ae sa fai pea le galuega ma le loto maualalo ma le faatoatoa, ma le faalagolago i le fesoasoani mai o le Atua. Ioe. Tatou te le mafaia se mea e aunoa ma le musumusuga lilo mamana. Tatou taumafai foi e faatosina mai faleia tetele. Faitio i le fai o laisene i vaa mai fafo. Ae faapefea ona o mai ia i faleia? E le feosofi mai lava ia latou feosofi i totonu o faleia. E tatau ona laisene vaa fagota e talaʻu mai ia i totonu o tatou faleia. Savali tetee foi le toatele ina o le a sui le itu o le auala e o ai taavale afi, faigofie ai i aiga ona maua taavale afi mai aiga i Niu Sila ma Ausetalia e atiae ai o latou aiga. Fai mai le au tetee, o le a tupu le mala i Samoa. E le itiiti ifo i le fituselau le fanau laiti o le a feoti i le vaiaso i suiga nei o le aualatele o le a fai. Teva toatasi atu ai ma le isi sui usufono Sinia o lenei vaega i lena itu, manatu o le a malepe le HRPP. Ua a nei; ua tele aiga ua faamanuiaina ai. Feoai isi i le taimi nei ma laulau o le a malepe le HRPP. E le mafai ona malepe se Vaega maopopo! Sei vagana foi se vale faataitai faapaupau na te le o faataua fetalai a lo tatou Alii. òE leai se Malo e tumau pe a vaevaeina.ò O Tulafono uma o lo o teuteu e le tatou Malo lenei, e mo le manuia lautele o lo tatou atunuu. E leai se Tulafono e taulamua ai le Malo lenei e agai ina leaga ai le atunuu.

FOFOGA FETALAI: O lou finagalo lava lau Afioga ae faatu se lafo e faai ai lau saunoaga faa-Minisita ona tatou malolo ai lea.

Susuga Hon TUILAEPFA FATIALOFA LUPESOLIAI AIONO NEIOTI SAILELE MALIELEGAOI: E avatu le malologa se i o tatou malolo ai pe a toe amata i le aso a taeao. E toe valu itula ia e totoe o lau í

FOFOGA FETALAI: E momoli atu le faafetai tele i le saunoaga a le Palemia, e manatu foi ua tatau foi ona tatou sailiili malosai, sa i ai lava le lagona e pei e manaia lava le soo o le fau ma le fau, ae ua matagofie foi le tuualalo a lau Afioga, ia tatou toe amatamea i le aso a taeao.

E momoli atu le faafetai tele i le paia ma le mamalu o le tatou Maota i lenei aso, manatu o lea ua tatou taunuu tonu i le tatou taimi malolo, ona ou lagona ai lea ua tatau ona tatou faia se faigamalologa mo lenei foi aso ma le tatou Fonotaga. Faafetai le onosai, malo foi le faapalepale malo le saunoa malo le tulei malo foi le sua, o a tiuga o le vaatele i lenei aso, e faapena le tatou galuega, o a foi a tatou upu felafaoi, tuleiga ma saunoaga, ia fale i le Atua o outou finagalo, o a foi ni upu ma ni tala i le futia ua sola ma aso ua alu.

18 FEPUARI 2015

Saunoaga Faa-Minisita a le Afioga i le Palemia

O upu lava ia o upu faafono, ua outou masani i le aumai avatu pe tatou te o i le lalolagi ma le lagi ma le vasaloloa, o le mataupu silisili ma talanoaga faatulafale ma suaga faatamalii, e faapena le tatou Maota, ae ia sa le fai mea ita.

O le agaga ma le faamoemoe e faapena o le tatou ato e fevaili ai, o le tiuga a tamalii ma le tiuga a faleupolu, e faapena le tatou galuega. Momoli atu foi le agaga faafetai tele i le piama ma lo outou onosai mai pea i le tau faafoefoeina o le tatou galuega. Ae o le faamanatu lava ia lo tatou Maota, aua nei manao i le ia ae manumanu i le upega, o lo o ua uma ona faataatia aulape o le tatou Tulafono Tumau, ao lea lava e talatala atu ona o le manatu atu, nei tei ua taofi taofi oso se toto maualuga o se isi faaletonu le aulia le tatou faigapalota, o le agaga ma le faamoemoe le paia o le tatou Maota, tatou tatalo i le Atua ina ia taitai lo outou soifua manuia ma lo tatou ola, ia tatou aulia ai le aso fono a taeao.

E momoli atu foi le faafetai tele i le paia ma le mamalu o le tatou atunuu ua tatou faatasi tupu ma ee, tamalii ma failauga faletua ma tausii ma saoa, malo lo outou onosai, talitonu o lo outou faatasi i le tatou Fonotaga, e sologa lelei ai foi nisi o mataupu e tapa ai la outou fesoasoani, faafetai Samoa, manatu e le o puaoa la outou faafogafoga, e leai foi se tagata o galue pea e aunoa ma le momoli o talosaga aemaise le tapuaiga aua le alo faiva a lou Palemene, o le tatalo, ia papa aveloa la outou tapuaiga, e i ai le faamoemoe o le a tatou toe feiloai i le aso a taeao ma le taualumaga o le tatou Fonotaga e pei ona fatulagaina.

O lo o i ai le faamoemoe o lo o malu puipua lo tatou Maota nei, o lo o i ai pea lo tatou ofisa mo le faamautuina, o a lava faamaumauga o pepa ma tatou mea masani, sei vagana ai a outou ato tupe e tatau ona outou o ma ave, ao tulaga uma o mea uma tau le Fonotaga ma mea o lo o faatulaga ai le tatou galuega, o lo o ua tapuaaoina e le Failautusi o le Fono ma le ofisa ina ia malu puipua mea uma. Ae lei tuu atua le fesili mo le faamaeaina o le tatou Fonotaga, ou te tatalo atu i lau Afioga i le Minisita o Galuega ma Atinae tetele lau susuga i le tiakono toeaina, tulai maia e aumai se feau o le aso.

Na motusia felafolafaiga ina ua tolopo Taualumaga a le Fono Aoao i le itula e 1:05 i le aoauli seia aulia le itula e 9:00 i le taeao o le Aso Tofi, 19 Fepuari 2015.